





歷官表奏卷第七

周益文忠公集一百二十



淳熙十三年

賀正旦表

臣伏以三陽交泰萬宇俱春恭惟皇帝陛下德並照臨
仁參化育受四海之籍將混一於丕圖慶八帙之年益
恢隆於至養新又新而弗息朔復朔以無窮臣忝綴弼
諧偶緣假告阻趨北闕但祝南山臣無任

德壽宮慶壽趣赴不及劄子

臣伏值陛下講稀世之潤典慶慈庭之萬壽凡一命而
上皆獲隨班入賀獨臣無狀驟感腰膂之疾不能起止

阻同百獸率舞彤墀之下其為悵恨深自憐憫謹具奏
知伏乞睿照

東宮賀正牋

舜曆誕頒方洽同文之化堯年益永載行慶壽之儀布
大喜於皇家集殊休於儲極中賀恭惟皇太子殿下中
和性稟英粹日躋我澤如春密致重離之助王明受福
適符交泰之辰對有倣之新祺協無疆之善頌某贊襄
何補暉潤焉依宮庭莫遂於膝行毫穎徒勤於頌禱無
任激切歸依之至

請假十日劄子

臣不善衛生腰痛日甚百藥俱試殊未有效欲望聖慈
給假十日庶幾一意將理獲遂痊平伏取進止

謝宣醫劄子

臣積為寒氣所薄有妨拜跪初誤信醫先投剛劑轉覺
腰背疼重不能轉側仰蒙聖慈宣遣王懋診視宣通熨
烙遂獲安愈再生之恩實踰天地臣昨日已曾奏謝伏
緣王懋連日至臣私第取效甚速已依例薄送藥材之
費欲望特降睿旨令懋收受臣無任感恩荷聖激切惶
懼之至

謝賜藥方劄子

臣早來伏蒙聖恩矜臣病衰教以服餌之要茲復恭承
聖旨賜到藥方二道便當修製服食仰惟天地之至仁
曲憐草芥之微命顧雖粉骨曷報鴻施臣無任

辭免慶壽轉官加恩劄子

臣準尚書省劄子節文二月八日三省同奉聖旨書冊
文官周某轉行一官依例加恩臣恭承明命震懼無地
臣聞國家爵賞之行蓋有二說非祿以詔功則予以馭
幸過是而加焉斯無名矣適者陛下極事親之誠心增
太上之顯號制度裁於宸慮陟降勤於聖躬其在群臣
固亦何預若曰國有大慶恩繇近始寔惟馭幸不必眠

功其如宿衛之日已叨賜賚禮成之後疊拜金贈繪茲為
予也多矣更加爵秩何以為名夫無名受賞雖踈遠之
臣猶畏譏議况乃參陪四近繫中外之觀聽者乎伏望
陛下照知忱誠愛惜名器及制命未下間許賜寢免是
固國體所繫非獨安臣私誼而已干冒天威臣無任戰
懼懇切之至伏取進止

不允詔

勅某云：具悉朕嘗歷觀前載博考舊聞求其寧親
介壽祉福兼備如今日之隆自三代以還未之有焉
蓋惟皇天右序我家太上克昭天德用申命於無疆

而二三執政之臣同寅協恭輔朕不逮兢：翼：仰承闕休屬者皇筭增衍鴻名益崇寶冊揚輝昭登億載卿以西樞之長毗予大政琬琰之刻藻翰是資乃體法端偉焜耀彌文朕甚嘉之進秩陪封庶酬美績顧惟丕慶誼不可辭所辭宜不允

辭轉官加恩表

臣某言伏蒙聖慈以臣書冊文轉行一官依例加恩尋具辭免伏奉詔書不允者慶賞驟加難於冒受溫言誕布諭以欽承心苟未安理宜自列臣某中謝臣竊窺國史深慕祥符詞章如陳堯叟之華問學如王欽若之懿

冠班聯於西府製壇頌於東封俱服恩徽越升階秩既厚政途之禮抑增儒術之光顧臣匪才適爾充位方上聖慶慈皇之壽即大庭陳玉冊之儀亘古罕聞崇朝創見獲班朝而已幸叨錫命以何居况無昔人屬思之勞敢用前日遷官之例是忘再瀆仰恩四聰伏望皇帝陛下有赫照臨不私覆載上稽乾道念臣非撰述官近比淳熙許臣遂懇辭之志蓋公聽並觀之在此亦小廉曲謹之當然倘明取予之方寧被黷煩之譴臣無任

批答

省表具之皇極之福有五蓋兼壽德之全天下之樂

者三實備父母之養永惟國慶丕奉親歡申開綿遠
之期並舉雍容之典粵增^華光於寶冊寶允賴於法書
不惟筆精墨妙而究勤於簡策之間抑亦武偃文修
而效美於謀謨之素宜頒寵教式懋賢庸閱休既軼
於前聞冲懇曷拘於近比無勞謙執亟服恩榮所辭
宜不允

辭轉官加恩第二表

臣某言伏蒙聖慈以臣再辭免書冊文轉行一官依例
加恩特降中使賜臣批答不允者萬年受祐溥推有位
之恩三命循墻度致益恭之懇渙雷風而荐至凜冰炭

以交懷臣某 中謝 臣竊以褒陟文階增封書社厥惟異
數以獎茂勳如臣者初乏事勞偶逢孝治當玉卮之稱
壽暨寶冊之垂鴻既不能潤色討論上議即之奏又無
以鋪張揚厲賡儒館之歌徒因朝野之歡例備股肱之
喜方將戒得敢復傷廉伏望皇帝陛下原省功疑厲精
賞慶重馭臣之大柄輕遷令之小嫌倘容必預於邦榮
姑願稍陪於祖食如是則邑辭多而受少尚晞子雅之
賢印趣刻而令銷彌顯高皇之聖陳情已至得請為期
臣無任

批答

省表具之朕惟子愛其親必務顯揚之美名實於實更資被飾之文維時寶冊之書繫我鴻儒之筆眷紳頌嘆牒簡光華矧妙運於元樞實共圖於大政克遂寧親之養尤嘉加輔德之勤既舉上儀盍頌茂賞諭言已至懇避猶堅且將姑拜於爰祖而復上還於文秩雖禮遜固能於為國難廢至公若官邑均所以庇身豈宜偏授其停奏牘毋闕寵章所辭宜不允仍斷來章

謝表

臣某言伏奉制命授臣正議大夫加食邑一千戶食實

封四百戶者得壽與名數錫寧親之祉進官及邑增褒共政之臣雖竊幸於逢辰顧何庸而受寵臣某中謝臣聞一人有慶賴及兆民萬壽無疆德加百姓蓋當寧懋隆於愛敬則敷天咸被於榮懷臣夙冒殊知又聯適列獲值堯年之永益觀舜孝之新日轂身依照臨首暨霄垠勢近潤澤先霑已超寄祿之階更衍爰田之賦周章拜命俯仰懷慙茲益伏遇皇帝陛下聖治通天仁心冠古俾爾戩穀尚不間於群黎猶吾股肱宜加憐於一體肆假濡毫之技茂揚出綉之言臣敢不深念僥踰力圖報塞德洋恩普難異眾以獨辭意廣才疎終悉心而自

竭臣無任

謝太上皇帝表

臣某言伏奉制命授臣正議大夫加食邑一千戶食實封四百戶者睿筭穹窿播鴻名於有永皇恩浹洽彰盛事於無窮何取駕才例叨僭賞臣某中謝臣竊觀自昔知名之士常恨罕逢極治之朝縱遭遇於休明或咨嗟於留滯而臣生當昭代仕歷要津紹興內禪之時綴官聯於烏府乾道推尊之日視詔草於鑿坡暨淳熙載舉於慶儀以禁直獲聞於赦令茲忝樞機之職復容琬琰之書凡大典罔不與焉在微生亦云幸矣賀唐南內每

慙韓愈之冠簪保魯東方更媿僖公之士宇寵光若此幸會何多茲益伏遇光堯壽聖憲天體道性仁誠德經武緯文紹業興統明謨盛烈太上皇帝陛下道備勳華性宗黃老民以寧壹嘗一視於華夷身其康強將齊休於天地是推惠澤以及臣隣臣謹當深念僥踰力圖報塞四方來賀已先武士之班萬壽無疆敢後封人之祝臣無任

謝東宮牋

某言伏奉制命授某正議大夫加食邑一千戶食實封四百戶者堯仁得壽載衍於徽稱漢爵酬功猥加於叢

品雖切逢辰之喜寔深浮食之慚某中謝竊以萬乘而奉庭闈十年而陳冊寶由聖主力崇於孝治肆皇天丕佑於我家聚盛典之常行渺修齡之未艾而某積緣幸會獲際休明參華帷幄之間染翰瓊瑤之上已為榮遇更冒恩章階升一等之崇戶斥四封之廣內循駑鈍難副鴻私茲益伏遇皇太子殿下性篤愛欽學該禮樂推事親之誠恪儼稱慶之威儀俯眷舊僚胥霑沛澤某敢不益恭乃職思稱所蒙朝野多娛正洽三宮之樂子孫逢吉永期五福之敷某無任

生日詔

勅某卿稟天間氣總國元樞方璧月之臨秋繫寶賢之降嶽稽循賜式往介壽祺今賜卿云：

謝表

臣某言伏蒙聖慈以臣生日特降中使賜臣羊酒米麩者勞瘁初辰仰閔睿聽肥甘飲賜俯逮私庭恩重不資感深無斁臣某中謝伏念臣稟生孤露逢運休明祿以榮親乃莫諧於終養廩惟稱事顧常愧於空餐久汙近司適因載育溫厚綸言之賜光華詔使之臨醪醴孔多餼牽有踐雖荷彌隆之眷實增弗洎之思茲益伏遇皇帝陛下恩結人心禮優士類飲食每歌於周雅割烹殊

異於湯臣施及庸才例頒寵數斯民仁壽幸未泯於餘
生既醉太平疇敢忘於美報臣無任

求祠第一劄子 九月

臣庸愚不肖誤膺簡拔又司宥密宜在黜幽特以大恩
未報不敢輕易言去比聞有人揭榜平江疏歐陽雋私
鑄沙毛錢則云恃臣鄉人言郭棣過失則謂臣嘗徇其
私請臣以匿名法不當問而所指之事於臣別無迹狀
遂置而不問但臣身備四近望寔素輕為人指名辱國
多矣今聞郭棣繳上件榜文申尚書省乞下有司究治
事既公行理難自默欲望聖慈許臣解罷密院職事處
以外祠庶幾他日根獲寫榜之人不至觀望鍛鍊各得
其平以示公朝不私之意伏取進止

第二劄子

臣克員政途閱歲滋乂事功何有罪戾則多雖陛下天
覆海涵未置譴訶之域而臣內循非據常履冰淵適已
具述懇誠乞一在外宮祠差遣欲望聖慈即賜處分冒
瀆天威臣無任戰懼俟命之至取進止

不允詔 洪邁撰

勅某云：具悉樞機重任寔係於安危輔佐大臣
義難輕於進退卿周旋二府荏苒七年有庇民之大

德而持之以謙有事君之小心而濟之以正雅望宏
度已穆在廷之瞻忠言嘉謨尤高謀國之體方究觀
於績用何忽冀於燕閒匪我攸聞亟其反室所請宜
不允

第三劄子

臣昨日疊具奏劄乞奉外祠伏蒙聖慈遣使宣押未許
其去仰銜恩施糜項莫酬心既難安理宜固請伏念臣
受才駑下百不如人而逢辰遇主徧歷華要承明三入
又踰一紀向居侍從分量已盈求閒之章頻達睿聽暨
參大政滋不遑寧但以去就繫人之觀瞻不敢如前之

煩黷荐更歲律乃嘗陳情未奉俞旨空慚尸素旋陪壽
幄益愧超遷方俟再期力申前志忽蒙簡擢升正使名
弗獲牢辭黽勉就職今復二年有半矣爵位已極才力
已殫在臣為當去邊鄙不聳盜賊不作在 為無嫌尚
或不知引退乃是前後故為背戾陛下縱加涵貸公論
豈肯恕臣瀝懇籲天益亦晚矣伏望聖慈矜其悃款惠
以初終推父母博愛之仁佚犬馬既窮之力速頒成命
安此危衷取進止

不允詔 洪邁撰

勅某云：具悉朕禮遇元臣義均同體樞機周密監

其夙夜之勤輔贊彌縫遲以久長之報正爾有功之
可績詎容無故以言歸卿忠力一心將明兩地太尉
之尊等相物望既隆三公之任承君官儀允協方此
巖廊之恭已是資帷幄之運籌荐騰引去之章殊非
仰承之意邊鄙不聳計見效以甚明膺力方剛在懷
安而未可體予申告毋或嗣陳所請宜不允不得再
有陳請

東宮賀冬牋

雲兆三登瞻慶霄之紛郁日行上道符化國之舒長叢
瑞應於宮庭浹懽謠於海宇中賀恭惟皇太子殿下英

明毓質仁孝根心象著重輪助照臨於兩曜地居蒼震
贊簡易於二儀茂對陽剛備膺天祉其容瞻玉色阻奉
金觥敬逢七日之來虔致億年之祝

辭免進書減磨勘劄子

十二月五日同施師點
黃治留正

臣等仰惟陛下愛惜名器以勸事功因臣僚乞裁進書
賞特軫聖慮斟酌區處內外大小咸得其當臣等蒙恩
各減四年磨勘許令回授天地之施草木知榮但臣等
昔雖備教掌故未嘗施鉛槧之勞茲忝二府又非經進
自不應叨被賞典况提舉官既許辭避則臣等愈無冒
受之理今來更不敢循例控免仰勤詔諭輒同具奏劄

月五日集 歷官表卷七 十一
懇請欲望聖慈特依所乞庶伸體國之誼抑逃僥倖之
譏干黷宸扆伏深戰汗取進止

淳熙十四年

辭免右丞相劄子 二月

臣伏觀今月十五日制書授臣光祿大夫右丞相加食
邑實封特降中使宣押赴都堂治事者輔弼之任古今
所難猥加庸愚良以震駭臣聞棟以隆而吉鼎以中為
寔本末或撓安能任重剛柔中節乃可參和伏况陛下
天縱聰明日新正治洞照群臣之能否恢宏萬世之規
模宜得真賢助調元化顧如臣者夫豈其人徒以蚤侍

軒墀久陪帷幄奉承教令苟違遣訶揆席偶虛敢期冒
進今雖聖神獨運總攬權綱並置疑丞間容克位然而
政省寔具瞻之地宰司非次補之官必欲僉諧固當選
衆倘謂綸言之已播輒沿故事而懇辭若昔仁皇登庸
次輔旋因物論改使樞庭當時貼麻人以為允伏望陛
下遠稽祖武博採公言毋以揚庭而難反汗俾仍舊次
適協前規免累聖主知人之明亦伸微臣量力之誼干
犯疏宸臣無任惶懼俟命之至取進止

不允詔

勅某云：具悉若昔帝王興起治功皆疇咨相臣協

月五日集 卷之七
謀同道故股肱良哉著於虞典左右惟人陳於商書
今並建輔弼共圖政績次相之任顧豈虛授卿職典
元樞迄茲累歲經綸周密備宣賢勞爰正鼎司益恢
遠業宜體眷意務先同寅總理萬幾登於至治庶幾
乎帝王之佐撫章來上未諭朕懷亟其祇承勿用謙
執所辭宜不允

辭免右丞相劄子

臣性質篤下一無所長誤簡睿知冒居政治缺然補報
常負兢憂苟違譴訶已為大幸敢圖選擇進貳宰司以
樗櫟之材參棟梁之任將何以仰禪聖化振起治功聞

命以還震惶失措除已具奏辭免外適緣連值節假未
獲拜伏黼宸之側懇祈渙汗之回謹重以手劄控叙危
衷伏乞聖慈俯賜鑒照

東宮劄子

某庸駑不肖久塵政地毫髮無補日俟戾及敢謂聖恩
驟有褒陟俾聯揆席自非皇太子殿下眷念舊人曲加
薦進其何以臻此然力小任重寔非所安已具奏懇免
欲望令慈因侍膳之間賜半言之助冀收渙汗安此危
衷冒瀆威尊某下情無任戰栗虔祈之至

辭右丞相表

臣某言伏蒙聖慈以臣辭免新授右丞相恩命特降詔書不允者小才積累久陪廊肆廟之崇大號渙揚驟置鈞衡之次恩踰始望理合終辭竊窺賜詔之溫彌覺危衷之惕臣某中謝臣聞國以弼亮為重古以疇咨為艱立賢無方選衆而舉若伊暨傳遠求耕築之中惟召與周近取弟兄之內自時厥後未見可觀率因望寔以推揚罕繫班聯之高下洪惟聖世迴掩前聞肇分佐貳之官並置東西之府既熟觀其器識復詳試以事為或揆席之偶虛繫宸旒之獨斷多由德進間以次升上允合於天心下亦孚於士論方之歷代最曰良規臣以迂愚幸

於際遇出入承明者踰二紀周旋兩社者幾八年以陛下聽德惟聰豈不察臣之尊主庇民之學以陛下知人則哲豈不鑒臣非助天理物之才特緣備使於機庭獲俾序遷於宰路寵雖至矣臣寔懼焉伏望皇帝陛下深軫睿思恪遵家法不輕命相惟務掄材况元輔處中足副仰成之意而舊人在外適當圖任之時徐觀奮庸亟許遷令如此則計資顯授已彰徧愛之仁引分聽辭又徇知難之義茲為兩得必契群情臣無任云云

奉御寶批降批

答不允

批答 李燾撰

省表具之樞極之任統幹萬兵鈞衡之司總揆庶事
夙均列於政地茲進登於宰庭所以疇其成勞昭我
隆眷矧文武萬邦之憲允謂全才而夙夜宥命之基
迄臻美業爰擢升於右弼用誕告於外朝所宜即副
巖瞻共熙庶績何異章之疊上乃渙號之久留且機
務至繁要使一日二日而無曠今謙辭已過豈勞再
命三命而益恭其若予言亟祇乃服所辭宜不允

第二辭表

臣某言伏蒙聖慈以臣上表再辭免新授右丞相恩命
特降中使賜臣批荅不允者麻卷初宣敬上懇還之奏

詔函疊下欽聆趣拜之言矧未副於僉諧顧敢忘於頻

異臣某

中謝

臣竊以宰庭當否國勢重輕四海皇皇旦

居中而枕奠萬幾業臯在右而績凝後暨漢唐之朝

雖慚帝王之輔然猶蕭曹同心而鴻業定房杜相濟而

泰階平矧逢大有為之時難用小有才之佐臣之不肖

衆所共知椽桷豈棟梁之材餅罌非鼎鬲之器叨蒙睿

獎久綴近司趨事赴功已愆於筋力立經陳紀有乏於

智謀固嘗面乞於守邊何當敢自期於當軸倏膺選任殊

駭聽聞諸大夫皆曰賢尚當採國人之論一男子即得

相寧不貽使者之羞倘昧牢辭將干大戾伏望皇帝陞

下如堯之咨四岳如舜之命九官與其因績用弗成始
從易置孰若及賢和相遜即賜允俞下可遂於身謀上
亦全於國體瀆尊之譴伏地以須臣無任云

奉御寶
批降批

答不允仍
斷來章

批答 李嶽撰

省表具之卿以高明醇正之資貫通古今懷誠秉節
表勵廢工自長西樞宣勞滋久乃進登鼎席弼予一
人朕志已定人望已孚而抗章三至懇辭彌確且在
漢制太尉相尊等耳今宥密領使蓋太尉之任則揆
路之進抑何辭焉卿其協圖政理同緝化機迄有殊

功是為美報謙遜之節固所嘉嘆而非所期望於卿
也其止奏封勿復來上所辭宜不允仍斷來章

謝表

臣某言伏奉制命授臣光祿大夫右丞相加食邑一千
戶食寔封四百戶累具辭免伏蒙聖慈特降中使賜臣
批答不允仍斷來章者聖主選賢久茲弄印愚臣該輔
忽爾揚庭懇避無從欽承有覩臣某 中謝 臣伏以虞書
二典若都若俞說命三篇或啟或沃惟言聽計從而罔
間則道同志合而愈光若乃元首既明而股肱非其良
巨川將濟而舟楫違於用是謂君唱而臣莫應上行而

下弗隨此舜帝所以博詢於惠疇而商宗所以遠求於
審象伊昔攸重厥今敢輕恭惟皇帝陛下躬上聖之資
纂中興之緒有萬世之志有奄甸八荒之心當得
異才共陪休運而臣性迂識暗意廣術疎使之抱槩懷
鉛尚容彊勉試以處中當軸豈所堪任簡擢誤加見聞
交駭雖布告已難於反汗而兢危殆甚於臨淵將何以
仰副延登下酬責望臣敢不圖惟薄效跂慕前修庶績
咸熙深念允釐之義一夫不獲常懷愧耻之思冀竭涓
埃少裨海嶽臣無任

謝太上皇帝表

臣某言伏奉制命授臣光祿大夫右丞相加食邑一千
戶食寔封四百戶有常立武久陪帷幄之中應變守文
躡進廟堂之上顧籌前之曠職恐歌後之貽譏臣某中

謝臣竊考中興以來號為多士之際作成有道任使無
遺宏材既顯於當時後覺復貽於今日如臣不肖被遇
有初自忝綴於下科即召居於左學旋由麟省分察烏
臺蒙拔擢之殊恩勵公忠之素守逮受知於聖主滋竊
位於要津揚歷禁途周旋政地龍韜豹畧已叨兵柄之
持鳳閣鸞臺更冒國均之秉莫容遜避徒劇凌兢茲蓋
伏遇尊號太上皇帝陛下德冠百王仁涵萬國巍蕩

蕩雖勲業之弗居濟：翔：猶賢能之在念是容蹇淺亦玷弼諧臣敢不勉殫千慮之愚圖報兩宮之造舉十六相舜功知廣於堯心為八千秋椿壽願符於莊頌臣無任

辭免兼職劄子

臣準省劄二月二十二日奉聖旨差臣提舉國史院提舉編修國朝會要所提舉勅令所寵靈參集恐俱交深臣竊以筆削二書該古今之德業討論三尺垂中外之章程苟非其人疇與斯事而臣最為冗陋積幸遭逢早並英遊葢萎窺於石室晚陪政路嘗同典於金科茲甫

踐於中台乃兼分於衆職自知忝冒人且譏訶仰冀聖明俯垂簡照加大名而修史特容李泌之辭定成法以寧民專倚蕭何之講毋使提綱之任重為竊位之羞瀆冒宸嚴臣無任云：取進止

不允詔 倪思撰

勅某云：具悉朕登崇弼臣摠領庶寮謀謨得業分疇左右之賢典策章程兼攬古今之誼卿學該倫類識貫本元茲奮庸於宰庭爰帥屬於史觀載統皇網之纂述仍提邦憲之刊修職並萃於真儒望益孚於衆雋自盼有命寔振斯文觀故事而條便宜更酌方

今之要務先遠業而奏寬大尚恢一定之良規其略
謙辭以抒賢蘊所辭宜不允

因陳賈論王謙待罪劄子 五月

臣叨被恩擢之初輒循舊例荐引王謙豈謂弗協公議
致有論列在臣不能旁招俊乂仰誤召命無所逃刑昔
元祐宰臣因薦館職失當具奏自劾輒緣斯誼仰瀆聖
明亦不敢居家待罪以動觀聽伏望出自睿斷特賜貶
降少懲謬舉尚圖後效以贖前愆伏取進止
奉御批降
詔不允

不允詔 李嶽撰

勅其云：具悉卿懋闡賢猷進持國秉甄收衆善摠

理庶工比於輔相之嘗初有薦揚之奏志本期於得
士誼寔見於首公雖由噴室之言宜停促召然在宰
庭之任要務廣求固無可引之愆難徇所陳之懇即
承予意益奮厥庸所乞宜不允

夏旱乞罷政劄子 六月

臣仰惟陛下日勤政治昭格天心累載以來時和歲稔
自臣備位東府即致早祥傳說之霖德裕之雨臣寔有
愧公言謂何況臣才輜望輕素乏相業雖微灾眚自合
黜幽伏望聖慈即賜罷免庶寬宸慮復見豐年伏取進
止
奉御筆批
降詔不允

不允詔

勅某云：具悉彌月以來常暘為沴並走群望未格山川之靈敬共明神莫回天地之意朕側身思咎拊已興嗟皆由庶政之失中敢以青灾而移下卿望崇丞弼忠輔國家方資益講於闕遺詎可輕圖於去就六事自責已愧成湯之謨三公免歸難循哀漢之典亟安厥位以邕遠猶所請宜不允

第二劄子 不曾付出

臣一介庸愚蒙陛下簡擢最早其於補報乃獨缺然自儀政遂閱日滋久容：備位既無以仰禋聖圖又不能

修明政刑究宣職業少副中外之望積為謬戾上千陰陽之和致茲旱灾見於登用之始天意明甚人情可知兼臣近者自劾謬舉蓋嘗面奏未敢因此決然引去只俟一兩月間別伸懇請今緣閔雨歲事可虞上下務：咎將誰執事既參會豈容復留伏望聖慈斷以不疑即賜黜免應天以寔 專在此干瀆宸扆臣無任戰灼俟命之至伏取進止

乞罷政表

臣某言近以雨澤愆期乞賜罷免伏蒙聖慈特降詔書不允者君德方隆宜多樂歲相才弗肅乃若常暘抗章

恭俟於嚴誅賜報尚循於彝典敢避竇尊之謹荐陳引
 咎之詞臣某 中謝 臣聞古有三公今為四輔實任燮調
 之責匪資期會之勞若登庸皆得其人則嘉瑞必為之
 應唯時盛夏久渴甘霖寧丁我躬上聖屢勤於精禱焉
 用彼相微臣難逭於常刑伏望皇帝陛下仰測天心俯
 稽朝論勿以前日詔除之悞而忘異時策免之規別求
 英猷協贊邦治三時不害消旱灾於頃刻之間九叙惟
 歌洽和氣於堪輿之內臣無任

不允詔

勅其云：具悉朕臨御以來惟民是念顧九夏亢陽

之沴歷日彌長撫一時咎證之深遇灾而懼天地弗
 臨於請禱神明莫監於精誠維歲事以堪憂當夜分
 而屢嘆卿夙由公望服在台庭觀茲膏澤之愆荐控
 免章之懇一人有過豈宜移置於大臣九叙惟歌所
 冀力行於善政亟其反室毋或贅言所請宜不允不
 得再有陳請

再同王丞相黃參政乞貶降劄子

臣等輔政無狀致茲旱灾上無以寬九重之焦勞下無
 以弭百姓之咨怨連章請罪恭俟汰斥豈謂陛下海涵
 天覆曲示眷留慚懼兢惶進退維谷伏見仁宗皇帝慶

曆七年嘗因久旱特從宰執陳執中宋庠丁度降官之請載在國史為後世法今陛下縱未許臣等同時遽去欲乞稽用舊章並加貶降不惟默當天意抑可少塞人言伏取進止

奉御批早暎為虐晨夕是憂弭災方賴於嘉謨貶降難遵於故事毋勤爾請用副朕懷

再乞罷政劄子

臣伏見夏秋以來旱勢日甚陛下齋心祈禱靡神不宗凡可以施惠恤刑求言損己無所不用其至宜乎順氣協應沛為膏澤然雲方合而復散雨欲下而還止禾稼就稿井泉將竭變異如此殆必有由非臣輔政無狀陰陽弗和之明驗歟前月二十一日嘗具奏旱災見於微

臣登用之始天意明甚蓋為是也今既再旬人情愈覺煎熬咎寔在臣何所逃罪伏望陛下特施威斷亟賜罷斥庶幾人心悅而時雨降不至專勞聖慮抑可少塞公言干犯威尊臣無任戰栗俟命之至伏取進止

辭免生日牲餼劄子

臣伏見連月以來雨未時若苗稼就槁群情嗷嗷陛下禹湯罪己至損內饗之常膳臣輔政無狀方俟嚴誅竊恐有司以臣日近初生例頒牲餼夫常袞辭賜饌於無事之際而微臣拜臺饋於貶食之時於義難安豈容饗餐伏望聖慈特蠲常禮俾道空餐仍加絀削以塞灾咎

干瀆宸嚴無任戰汗之至取進止

奉御筆批
依所乞

同王丞相黃參政乞減俸劄子

臣等伏見皇帝陛下以時雨愆期憂勤備至減膳徹樂
聖心焦勞臣等燮調無術致此災沴陛下縱未欲並行
罷免猶當貶秩以懲失職前既控請未蒙賜允今復再
旬旱勢轉甚夙夜震懼益不遑寧倘陛下尚俾自詭後
圖且乞將臣等月俸餐錢並從減半支給庶幾薄示警
戒以弭天災运用有年未必不由於此伏取進止

七月十四

日奉御筆
批依所乞

辭免復俸劄子

臣猥以匪才過尸榮祿伐檀之刺每愧於中比緣旱災
乞減半俸今方踰月未贖前愆詎意洪私亟令仍舊載
恩深重省已兢皇方與攸司協圖荒政民無艱食乃敢
復常願俟來春欽承聖意臣無任惶懼俟命之至伏取
進止

不允詔 李燾撰

勅某云：具悉時會亢陽憂形巖廟嘗覽勞謙之請
姑從減俸之誠曾靡踰期遽能銷咎繫彌縫之宣力
竟燮理之召和且咸享天心久復膳羞之御而散無
友紀幸寬籛賜之調迺泊於茲俾還其舊何勤列奏

更俟來年若早歲之作霖要共圖於澤潤馭群臣而
曰祿顧敢後於弼諧其體深衷無煩多遜所辭宜不
允

賀東宮生辰劄子

某茲者恭值皇太子殿下誕序載臨仰惟福壽兼隆與
天同永而况兩宮交致慶禮是誠前代所稀某夙被恩
憐今復密依重潤雖不獲與僚家展拜於庭顧野芹致
敬安敢虛拘輒忘進越僭具別紙伏乞令慈俯賜矜恕
某下情無任頌禱慚懼之至

歷官表奏卷第七 終

歷官表奏卷第八

周益文忠公集一百二十九

淳熙十五年

辭免謚冊寶行禮支賜銀絹劄子

三月 日 同諸廳

臣等準奉上謚冊寶行禮都大主管所傳奉聖旨以臣
等告廟奉上兩節次各賜銀絹臣等恭惟先皇厭世支
費不貲陛下聖孝通神務隆追遠臣等忝備近列謹當
體國縱未能少捐俸入仰助職金豈容冒膺厚賜况茲
恤典異乎慶禮臣等決不敢祇受伏望聖慈亟行寢免
臣等無任祈天俟命激切屏營之至伏取進止

攝太傅持節前導太上梓宮量帶激賞庫官會

犒設劄子

臣被旨前導太上梓宮過江止關借奉使印一面并帶禮房五人使令五十餘人既不曾有所申請即無借請批支恩賞之類恐到攢宮犒設人匠等於事體或不免已令激賞庫使臣量帶官會前去謹具奏知伏乞睿照

光堯梓宮發引慰皇帝表

已下攝太傅從梓宮同諸使

臣某等言今月十八日恭導聖神武文憲孝皇帝靈駕發引者賓天浸久遠日俄臨儼縞仗以前陳指濤江而利涉臣等誠哀誠痛頓首頓首伏惟皇帝陛下邁周達

孝如舜慕親已邁執翣之驅未弭割繩之痛尚祈寬釋以幸適遐臣等無任瞻天望聖激切屏營之至謹奉表陳慰以聞

慰皇太后牋

臣某等言今月十八日恭導聖神武文憲孝皇帝靈駕發引者厥儀夙設法仗載嚴背宮苑以徂征隔烟波而少駐臣等云云伏惟皇太后殿下至哉坤載痛此天傾念五紀之順承忍一朝之變故願寬聖性永著母儀臣等無任激切屏營之至謹奉牋陳慰以聞

慰皇后牋

臣某等言今月十八日恭導聖神武文憲孝皇帝靈駕
發引者龍胡滋遠悲莫返於慈宮鳳綵啟行帳暫留於
近岸臣某等云云伏惟皇后殿下道隆周妣德協虞賓
久宣盥饋之勞方助聖明之孝願循至理少抑哀悰臣
等無任

光堯梓宮到思陵攢宮安寧奏狀

臣某等恭導聖神武文憲孝皇帝靈駕今月二十二日
已達永思陵攢宮安寧者八翼徐行百神祇護奉輜車
而戾止瞻陵阜之巋然欽惟慈皇獨享至養富貴尊榮
之樂歲月彌長康寧壽考之祥古今鮮儷茲陟乘雲之

御將臨甫窹之期出城闈則景霽而月升渡浙水則風
和而潮應曹非人力寔契天心此蓋皇帝陛下躬舜禹
之資邁參騫之行定恤雖居於宮闕懷思每置於川途
繫次舍之無虞皆孝誠之有感臣等猥叨官使何補司
存想聖慮之少寬與群情而胥幸瞻望宸宸臣等無任
激切屏營之至謹具狀奏聞謹奏

慰皇太后牋

臣某等言恭導聖神武文憲孝皇帝靈駕今月二十二
日已達永思陵攢宮安寧者羽衛煌煌共隨仙仗佳城
鬱鬱甫達初陵臣某等云云伏惟皇太后殿下輔佐功

高慈仁道備位方隆於儷極痛乃隔於終天願抑哀思
獨膺至養臣等無任激切屏營之至謹奉牋陳慰以聞

慰皇后牋

臣某等言恭導聖神武文憲孝皇帝靈駕今月二十二
日已達永思陵攢宮安寧者殿虛德壽莫迄於容車陵
揭永思初停於畫翬臣某等云云伏惟皇后殿下柔明
蘊質愛敬存心久佐餽以歡然茲過宮而戚若尚祈寬
釋庸輔皇明臣等云云

三月二十四日奏

臣等到永思陵已三日陰雨連綿乃春夏之常前者在

途特然晴霽聖孝昭格蓋可見矣即日恭惟聖躬萬福

臣等謹此伸候起居伏乞睿照

三月二十七日奏

臣等不侍天顏已經旬浹恭惟聖躬萬福謹上問起居
謹奏

永思陵掩攢慰皇帝表

臣某等言今月三十日聖神武文憲孝皇帝攢宮掩皇
堂禮畢者稽陰地勝陵邑天成立繞四蛇居切帝鴻之
畏勢如萬馬允符郭璞之占大事克襄淵衷永慕臣某
等誠哀誠痛頓首頓首伏惟皇帝陛下誠深繼志禮厚

崇終三載哀麻正百王之墜典五詩挽餞感萬姓之悲
心茲甫畢於因山諒興哀於陟岵願副含生之望少寬
罔極之懷臣等無任瞻天望聖激切屏營之至謹奉表
陳慰以聞

慰皇太后牋

臣某等言今月三十日聖神武文憲孝皇帝攢宮掩皇
堂禮畢者六紼引輜甫諧襄事九虞發輒初導靈威念
永闕於梓宮諒增悲於椒殿臣等云云伏惟皇太后殿
下夙推厚德久播徽音西宴瑤池莫返穆王之駕東朝
長樂方隆漢后之儀願紓慈壺之過哀永受聖君之至

養臣等無任激切懇祈之至謹奉牋云云

慰皇后牋

臣某等言今月三十日聖神武文憲孝皇帝攢宮掩皇
堂禮畢者地隣禹穴土復堯陵繫聖孝之加隆諒柔衷
之眷惻臣等云云伏惟皇后殿下協宣陰教夙著婦儀
當九鍾之告成偕兩宮而永慨方勤內助願抑至情臣
等無任

乞尊從虞主還行在奏
同摠護禮儀：仗鹵簿
橋道頓遞使奏

臣等準尚書省劄子備坐禮部太常寺狀三月三十日
聖神武文憲孝皇帝梓宮掩攢宮畢所有攝太傅摠護

使以下行事官即便回程三月十六日奉聖旨依臣等
 檢照本朝故事山陵等五使係隨虞主還京紹興十二
 年徽宗掩攢之時緣紹興七年先已立虞祔廟總護使
 以下所以徑赴行在至紹興二十九年顯仁皇后掩攢
 誤用紹興十二年變禮今來聖神武文憲孝皇帝虞主
 在途事體不輕臣等欲參酌典故導從渡江比之徑回
 止爭三日餘行事官自遵已降指揮先回於義為允伏
 取進止

奉聖旨依

謝傳宣撫問并賜銀合茶藥狀

四月

右臣伏蒙聖慈特降中使傳宣撫問并賜臣銀合茶藥

者堯陵送往魏闕勞還寵之慰藉之言貳以珍良之賜
 拜恩深厚揣分兢慚伏念臣祇率故常暫從行役繫懋
 隆於聖孝致昭格於天心况親賢宣總護之勞且郡邑
 勵恪承之志禮無違者臣何力焉伏遇皇帝陛下至德
 奉先深仁待下既克襄於鉅典庸加惠於庶工不遺尸
 素之臣亦溥龍光之施莫知報塞惟誓糜捐臣無任感
 天荷聖激切屏營之至謹錄奏謝以聞謹奏

未敢乞對劄子

臣等訖事歸闕今早已放朝見竊恐親行三虞聖心惻
 楚未敢乞對恭候奏事日分俯伏榻前控叙悽之情

仰乞睿照

辭免德壽宮銀絹劄子

臣昨於三月十七日準主管支費所送到德壽宮遣奠奉辭發引三節次銀絹六百疋兩日子一道緣臣未得俯伏控辭是以不敢支請今早登對亟露危懇蓋緣昨來奉上聖神武文憲孝皇帝憲節皇后冊寶已叨錫賚自不應重疊冒受厚賜曲蒙聖慈諒其誠請許以辭免所有日子謹用繳進乞降付支費所照會毀抹取進止

求去劄子 四月

臣輒披悃幅仰瀆聖聰臣以匪材久塵二府適虛次輔

遂預政機望實素輕衆所不與蒞職伊始即因薦士被沮臣忝備近弼惟當助成臺諫敢言之氣不敢有所分辦蓋嘗奏知少俟數月即謀引去偶因去年閔雨繼以高宗變故逡巡苟且忽爾踰年方欲力伸前請又值首相丐外臣驟以疎率猥尸大任曉夕憂懼自知必致人言昨日果有臺官文字覺察大理司農除授非宜夫相業惟在進退百官而臣進擬之初便致論列若復頑然不顧廉耻包羞竊位繼此別有彈擊必將倍費保全又况旬日以來雨意愷甚由臣涼薄再召早祥衆情嗷：誰執其咎夫人主之職專在論相欲知相之賢否惟視

人心天意如何今臣自蒙擢任每為公論所非連歲之間雨暘罕曾協序天人之際亦可推矣伏望陛下收還印綬許奉外祠仰成真才庸贊聖治自然衆志孚而時雨降非獨微臣獲免大戾抑天下幸甚干犯威尊臣無任戰栗俟命之至取進止

辭免提舉編修玉牒劄子

臣準尚書省劄子五月二十二日奉聖旨差臣提舉編修玉牒臣欽承恩渥增震孤衷伏以紀謨烈以示後人繫本支而綿百世鏤牒本由於唐代成書獨備於聖朝粵自中興尤嚴故寔雖承乏或容於次輔而提綱當俟

於元台豈伊具臣堪此衆職矧百僚之不廢任虛次以何嫌仰冀皇明俯昭愚悃免與聞於大典姑曲徇於小廉冒瀆天威臣無任戰栗俟命之至伏取進止

不允詔

勅某云：具悉朕承祖宗之休尊典則之懿賸寶牒之所勸與史冊而並驅業盛功崇必謹儒紳之載筆事宏體重要勤揆席之提綱乃咨弼亮之英俾總纂修之緒惟文而作一藝勉率乃僚則錫羨而符三皇永垂厥後方茲倚矚奚用懇辭所辭宜不允

再辭免劄子

臣近蒙聖恩差兼提舉編修玉牒嘗具辭免伏奉詔書
不允臣以曾懷葉衡史浩趙雄王淮任右相日皆兼此
職又參知政事留正見同提舉詳定勅令蕭燧權監修
日曆事體適均臣所以不復固辭然亦未敢祇受勅命
今觀已降指揮用紹興三十一年故事省罷勅令所則
是留正別無兼局而臣已自提舉國史院會要所若猶
兼領理有未安欲望聖慈改差留正權提舉編修玉牒
庶得允當伏取進止

奉御筆
批依

淳熙十五年

明堂禮成同宮僚賀東宮劄子

某等茲者伏觀大禮告成聖君受祉恭惟皇太子殿下
竭誠清廟致敬貳觴協修上儀均惠四海某等未獲躬
詣宮庭下情無任瞻仰頌詠之至

謝封濟國公表

臣某言伏奉制命封臣濟國公加食邑一千戶食寔封
四百戶者配天其澤溥均汶上之釐裂地而封首賜濟
陽之履逢辰有幸揣分無堪臣某 中謝 臣竊以偏扶群
神莫嚴宗祀肇分五等寔重公圭當聖君不憚於親祈
宜百辟咸思於職助而臣學懵九筵之制位叨兩社之
間猥備相儀甚慚該輔拜恩綸而邀福啟封國以知榮

茲蓋伏遇皇帝陛下誠格顯幽仁周品物謂天地祖宗之並况已敷錫於臣民則股肱心腹之同休宜申加於爵邑是推洪施固間素餐臣敢不仰服寵光俯殫駑鈍感鬼神而問通今雖愧於博聞披輿地之圖復古尚期於親見臣無任

謝東宮牋

某言伏奉制命封某濟國公加食邑一千戶食實封四百戶者相禮親祠幸免周南之嘆敷綸禁苑榮加濟北之封恩厚不替感深無藝某中謝竊以歲儀三歲今古之彌文均福萬方國家之盛德凡預駿奔之列率先賚

予之豐如某者獲際昌辰叨塵近弼初乏一毫之補俶開百里之邦雖潤澤之溥施在孱庸而獨愧茲蓋伏遇皇太子殿下聰明仁孝恭敬溫文重屋貳觴儼進陪於陟恪繁機參決居家助於厲精眷乃舊僚被之新渥某敢不深思遇合勉竭贊襄受宣室之釐此日固慚於前席賜齊侯之胙他時猶冀於歸疆某無任

辭免加恩正謝日權賜劄子同執政

臣等恭大禮告成蒙恩各加封邑無功受寵慚懼因措虔遵近詔不敢陳免今欲來日祇受告命二十八日入謝所有例賜衣帶鞍馬非惟已沾賚予不應重為廐

庫之費兼臣等帶佩鞍韉既未仍舊亦難拜賜於庭伏
望聖慈權許寢免一次庶安愚分稍協於禮伏取進止
奉御筆
批依

乞去劄子

十一月四日上宣
諭內禪事不許去

臣敬攄愚悃仰瀆睿聰伏念臣本緣涉獵藝文僥覲祿
仕不自意蒙聖主非常之知致身華要年除歲遷遂玷
宰司物望不孚心常自歎蓋以性資淺陋非大受之器
舉措輕率非任重之才比日以來憂懼成疾外猶勉強
中寔哀疲雖荷陛下待遇優隆信任專一偶未置於訶
譴然趾顛鍊覆人多為臣危之引退曲折夙嘗具奏幸

今國家閒暇可以陳情伏况臣自還從班於今十有四
載叨塵二府又涉九年歷考在廷鮮有如是之久者每
見士大夫更迭補外未嘗不省躬而愧也且漢文帝時
周勃甫為相會遣列侯就國辭不行即免勃以率之槩
諸古誼臣今有請亦晚矣伏望聖慈洞察衷誠保全終
始許解機政界之外祠微生苟未隕越他日誓死報國
干犯天威臣無任震灼俟命之至取進止

淳熙十六年

辭免左丞相劄子

正月八日

臣伏蒙聖慈授臣左丞相仍降中使宣押赴都堂治事

臣驟聞成命凜無所措竊以左右置輔均為股肱顯面正朝尤謹厥與典是宜博謀於縉紳參考以夢卜惟賢是用鈞筭何嫌不當如庶府百司許以序遷而倖進也如臣庸鄙加之懦弱初無才能術學可備官使特由幸會悞被簡知周旋政塗殆且十載凡陛下試臣者不為不乂用臣者不為不盡而年齡晚晚鼠技易窮竊位素餐愧見班列比嘗求退未奉俞音仲春再請之言已闕睿聽敢期恩獎更冒超遷譬如疲馬伏在廐捱縱復益之芻秣嚴其鞭策非特難於致遠抑將顛踣是虞此臣所以跼蹐戰兢辭避不容於備禮也伏望陛下推父母愛

憐之德廓日月照臨之明與其用之過而納之罪戾之中孰若察其情而措之安全之地收還渙渥少息危懼引分歸耕嗣輸誠懇冒犯天威臣無任虔祈俟命之至取進止

不允詔

勅某云：具悉上相之任總領百官惟德望足以尊朝廷才量足以任天下乃膺倚屬以起治功卿命世鴻儒高明特達自持國秉績用為多曩居次輔夙夜究勤而庶政日新百度具舉既深契於朕心就陞端揆益示褒崇牘章鼎來謙辭恭過非朕所聞也即宜

歷官表奏卷八
祇命益底殊功所請宜不允

第二劄子

臣一介無取蒙陛下待遇殊常致身輔相初無毫髮之善可報萬一坐是兢畏過甚流於委靡徒以貪戀聖恩未忍決然引去忽聞宣制躡進左席宜黜而遷方此惶惑豎讀訓詞有患失容身之戒臣心魂飛越無地措躬蓋以孔子所謂鄙夫乃無所不至之人車千秋之容身班固以彼哉誦之今乃使冒居元輔朝夕左右將何以倡率百辟風示四方且中外臣庶明知兩相制書抑揚不同在於人情寧免觀望往者洪适固有此語隨即被

劾蓋龜鑑也臣來日更不敢入局候十一日榻前控陳懇款謹先具奏稟伏望聖慈念其奉事之久閱其自處之難特賜矜體稍全進退臣不勝萬幸干犯宸嚴臣無任戰慄俟罪之至

東宮劄子 同日納

某伏觀今月八日制書除某左丞相某庸愚無取已試因功誤被恩遷寔踰分量已具奏控免欲望令慈因視膳問安之際賜以一言庶幾收還成命安此危衷某下情無任虔懇之至

乞去第一劄子 正月十一日

臣輒傾肝膽仰瀆睿聰臣器資庸陋謨謀淺拙徒緣翰墨遭際盛明歲月推移馴玷丞輔毫分莫効慚負在中爰自去冬力求罷免聖恩天大未賜允俞即嘗面奏候正二月間再伸懇悃必冀矜從今方欲陳述間忽被遷陞之寵周章失措如蹈淵谷若不亟投君父期遂夙心則祇受新命之後又須年歲乃敢繼請非獨智力殫竭決無能為而有言不踐寔隣欺誕為臣如此罪豈容誅伏望聖慈俯加憐察許臣解罷機政授一在外宮觀差遣餘生倘或未泯誓圖報於異日干犯威尊臣無任戰栗俟命之至取進止

奉御筆批朕登庸元輔委任尤深遽上詞章寔難從允可降詔不允

不允詔

勅某云：具悉君臣之道相須而成廟朝之賢益重其選矧若鼎司之舊方加魁柄之崇期體此以欽承曷翩然而引避朕登庸元輔委任尤深遽上祠章寔難從允宜即承於親詔乃克副於眷懷所請宜不允

第二劄子

十三日御前遣人有所批問附奏

臣昨日陳乞罷政恭聆玉音謙諭過甚臣驚懼感激未能畢其說而對班將引遂忽：而退尋聞貼麻批詔兩日之間三勤勅使宣押凡可以假借微臣者無所不用其至在聖君優禮近列務存體貌可謂重矣臣之進退

所宜自審蓋以性資凡下本無輔相之才非獨聖鑒難
逃詢之輿論莫不謂其當去是以自冬涉春每因留身
必面奏此意忽叨除授義難安處乃敢決然有請豈謂
眷寵殊常未賜聽允已上表陳乞而通進司得旨不許
收接恭俟十五日俯伏軒墀別伸情悃謹此附奏臣無
任戰懼之至伏乞睿照

第三劄子

十四日御前復遣人有所批問再此附奏

臣近累具劄子陳乞解罷機政授一在外宮觀差遣特
蒙聖恩三遣中使宣押仍傳旨令趣朝叅奏事在於恩
禮可謂詳盡臣尚有曲折須至奏稟蓋搢紳間只知臣

因八日制詞播告懷不自安然十一日初至榻前陛下
即宣宰執並前聖語諄備彰謙抑臣兢惶失措感極
涕零旋聞宣召詞臣改製謨訓且復親批四句載之答
詔昔熙寧中王安石因詔書有士夫沸騰黎元騷動之
語辨數乞退神宗皇帝止諭為文督迫之過今者訓飭
乃與蔣芾所草洪适制並同恐是一時遣詞循用前例
而陛下聖語恩勤不止於為文督迫而已臣豈敢以此
過疑固執愚見但臣自去冬至歲除及今年正月五日
四留身具言臣非輔相之才願備祠官少遣尸素此則
陛下所知而中外所未知也臣若未有遷除尚可少緩

今乃就陞元宰安得無嫌故官既不可居新命又難祇受在臣進退之誼自宜力請即與前說不相干涉仰惟聖明必賜矜察臣緣章表無由投進又有旨不許出門欲俟來早面奏深恐駕出難以詳述謹先此附奏伏望聖慈即賜處分疊犯天威臣無任戰懼俟罪之至取進止

第四劄子

臣昨日再具手劄乞罷機政授一在外宮觀差遣見今踉蹌俟命緣臣既難復居舊職又不敢祇受新命進退無據心不違寧欲望聖慈速降處分臣無任戰慄祇懇

之至取進止

後因臺官上殿及翰林學士李燾上云朕何嘗令如此措詞遂降旨與即明日將上

乞除職名上不許

辭免左丞相表

臣某言伏蒙聖慈以臣辭免新授特進左丞相進封許國公加食邑食寔封恩命特降詔書不允者登備宰司久當策免普持魁枋倏奉庭揚籲天陳不稱之詞伏地拜弗俞之詔鴻私溥博孤跡凌兢臣某中謝臣聞受才有洪纖賦質有良窳扶明堂者資梁棟安用條枚薦清廟者須鼎彝寧參瓦礫力不勝任人將汝瑕伏念臣振闡材微斗筭器小會際光華之旦追陪寅亮之聯罪功

宜照賞誅漫無可否賢鄙當明黜陟殊惜抑揚觀已事之如斯豈後圖之足責敢謂羣賢之進遽叨左席之除有次輔雖不備官職烏何曠無成勞亦令賜位臣也胡顏為國計以牢辭非身謀之獨審伏望皇帝陛下謹於圖任監乃知難外求巖穴之英內選朝廷之雋備居三事庸長百僚遜於及斯伯與敢忘稽首有若虢叔閱天尚助迪威從欲之仁鞠躬以俟臣無任

批答 倪思撰

省表具之魁柄之重疇咨惟難未得其人擇之貴乎審已當其選任之不復疑卿以大道格君心以至公

宰天下已試之效昭然甚明非常之才用而未盡爰升元輔式究遠猷乃於登庸之初遽欲引避而去開諭已至懇祈尚堅在朕心則注意方深在物論則僉言惟允及斯伯與固可遜未聞虞舜之必從虢叔閱天雖曰賢視周公而弗及以是為說毋乃太謙亟其祇承副此隆委所辭宜不允

第二辭表

臣某言伏蒙聖慈以臣上表辭免特進左丞相進封許國公加食邑食實封恩命特降中使賜臣批答不允者銀臺入奏力辭端揆之崇鑿禁批章特屈王人之重雖

貪承命抑懼瘵官敬陳確至之言疊冒穹窿之聽臣某
 中謝臣聞位高者智愚難掩任久者賞罰易行九載之
 績不成當從蘇頌三考之明弗陟孰底舜功如臣無堪
 被遇最早越自嚴徐之列進陪夔契之遊碌政途殆
 彌七歲容宰路仍涉再暮論其時則已多責其效則
 何有未能引去姑俟汰歸今乃位充元輔之久虛秩序
 文階之一品既殊試可又異黜幽况故官不許復居而
 新命又為非據進退交違於小諒勸懲將累於大公伏
 望皇帝陛下旁燭中忱敷求俊傑貸妨賢之往咎審佐
 聖之良圖謂如髮之引千鈞其誰云可因循墻而走三

命亟報曰俞情辭已竭於肺肝察允尚收於綸綍臣無

任云：奉御筆批降批答
 不允仍斷來章

批答

省表具之朕念天下萬幾之繁宵旰臨朝未嘗敢一
 日怠也惟卿處輔弼之任寔攷：奉國夙夜勤彊總
 領眾職以副朕意是用進之上宰益究所施而乃懇
 避再三逡巡未就累日於此豈不少淹庶務乎往其
 勵翼毋復有陳所辭宜不允仍斷來章

謝表

臣某言伏奉制命授臣特進左丞相許國公加食邑食

實封累具辭免伏蒙聖慈特降中使賜臣批荅不允仍
斷來章者次輔躡居久知非稱冢卿序進彌愧因功賜
漢位以升階假許田而胙土恩高峙嶽懼甚履冰臣某
中謝臣聞天以不言行四時賴回旋於六子君以無為
成萬物資勵翼於四隣繫上下之相須乃事功之克濟
諒非帝賚疇允民瞻如臣者學昧通方才疎應務僥倖
夙膺於簡擢選除徧歷於高華粵自登庸每虞曠職土
疆尚隔魯何闢國之謀人力未蘇安得富民之策清不
足以革貪奢之俗直不足以移委靡之風而况熨調陰
陽制作禮樂遠繼三謨之盛俯諧四岳之咨退省其愚

固慚斯道方懇祈於罷免乃悞被於起遷嘗抗疏以屢
辭迄覲顏而祇拜茲蓋伏遇皇帝陛下聖神廣運功德
兼隆有臣三千已得同心之助舉相十六聿觀熙載之
能何取妄庸首陪弼亮臣敢不深思忝冒力勉墮媮惟
尹暨湯雖乏格天之效安劉必勃尚存念祖之心臣無
任云々

謝東宮牋

某言伏奉制命授某特進左丞相許國公加食邑食實
封者選備宮端久戴密庸之造擢持魁柄更叨序進之
恩倣拜賜於龍墀即叙言於鶴禁某中謝伏念某居慚

歌散素昧經綸偶逢亨嘉浸竊顯美自親附於三善殆
 推遷於六年知憐既殊獎勵尤至賴褒揚於黼辰俄參
 幹於鈞樞猥以小人之儒遂為天子之宰眾譏弗稱心
 識所從益魏相鍾繇賜釜本東宮之眷而唐登從愿覆
 甌資儲極之言昔也耳聞今而身見茲益伏遇皇太子
 殿下功高監撫譽著參裁作新無間於羣才念舊不遺
 於一介肆頒邦渙交秉國成某敢不叙飭九功總提眾
 職仰稽象緯顧顯面以非宜俯振朝綱尚同心而夾輔
 其無任

辭免兼職劄子

臣伏觀今月二十八日已降指揮差臣兼提舉編修玉
 牒監修國史日曆者任非所據愧不自勝臣聞百世本
 支方慶源之有衍萬年壽考正鴻業之無窮雖筆削屬
 在羣臣而總提付之上宰倘其人之未稱寧厥位之或
 虛如臣闕然何以堪此伏望陛下念聖世當嚴二典察
 腐儒素乏三長毋專故事之循徐俟真才而授丹衷斯
 罄淵聽必享所有前件兼職欲乞聖慈特賜寢免臣無
 任戰懼俟命之至伏取進止

奉御寶批
降詔不允

不允詔 倪思撰

勅某云：具悉朕嚴錄牒以揚列聖之休謹汗簡以

紀當世之寔纂修之職分命於諸儒綱領之權必歸於上宰卿以造微之學貫道之文既擢冠於羣工宜并提於二史益摠賢蘊增煥皇猷條祖宗典則之宜進而施於政舉朝廷事為之要退而筆諸書豈不休哉無足辭者所辭宜不允

歷官表奏卷第八終

歷官表奏卷第九

周益文忠公集一百三十

淳熙十六年

辭免少保劄子

臣伏觀制書特授臣少保進封益國公加食邑食實封者殊私曲被駭汗交流臣聞賞當其功謂之慶授非其人謂之僭適者壽皇聖帝親以大寶傳授聖明當行慶施惠之初夷夏傾耳以聽號令臣於斯時悞尸宰事所宜協贊陛下愛惜名器修明紀綱豈容身自僥踰或愆於義伏况孤保之任專待勲德前後輔臣得此者鮮而乃首揚大庭之號加臣非分之寵本欲行慶反近僭賞

其為初政之累也大矣臣今未敢奉行制命蓋將必冀
寢免若謂溥博之恩徧及臣庶不使微臣獨未沾被則
臣固嘗面奏乞許回授私心公論庶皆合宜伏望聖慈
特賜矜允干犯天威臣無任兢惶懇切之至取進止

寶批降
詔不允

奉御

不允詔 倪思撰

勅某云：具悉昔舜以天下禪禹精一執中之旨既
心傳而面命之矣又擇益稷之賢置諸左右以輔相
其治授受之美於是為至惟我壽皇寔用此道將以
神器畀於冲人故首擢卿居上相之位卿親逢盛時

密贊大計肆朕纘紹凡厥政事悉所仰成茂勲如此
晋位亞保疏封大國其於寵褒未為過也往其祇命
毋事固辭所辭宜不允

辭免表

臣某言伏蒙聖慈以臣辭免特授少保益國公加食邑
食實封特降詔書不允者該輔無功際九五御天之始
疏榮有命居二三執政之先方備控於忱詞已隨頌於
溫詔明知踰分敢避瀆尊臣某 中謝 臣竊惟左棘之聯
時乃面槐之貳周官立訓資兩儀寅亮之功漢志垂謨
任萬乘燕私之責歷代久忘於古誼政和初定於宏規

必酬勲德之隆或待親賢之茂上非虛授下難冒居如
臣者稟資迂愚遭世休顯大言則望大利每愧事君小
材不離小官自甘累日詎期頻歲連陟崇階會逢離照
之明更下巽申之命式是百辟久不稱於儀圖茲惟三
孤顧豈容於官備伏望皇帝陛下道無私覆明以公生
謹旌褒者當在政初抑僥倖者必由貴始特回悞寵姑
許貶恩既免累於清朝亦獲安於素守臣無任云云

寶批降批
答不允

奉御

批答

省表具之壽皇不以朕菲德使承大統既擢卿上台

屬以輔朕在廷翊戴之勲未有先於卿者矣進班孤
棘寔按著令而卿執謙采確引義固辭使朕崇報之
意憚然不安於中在卿則為高在朕則為薄矧當初
政令出惟行既已告廷豈容反汗卿宜為國惜之其
即欽承無廢休命所辭宜不允

再辭免表

臣某言伏蒙聖慈以臣上表辭免特授少保益國公加
食邑食寔封恩命特降中使賜臣批答不允者悃悞之
言踵詔音而上瀆丁寧之訓勤勅使以來宣凜危慮之
未安控堅辭而弗已臣某 中謝 臣竊以龍飛之慶溥及

華夷蠢動之微咸沾雨露幸叨居於輔佐例覃被於光
 榮倘大義之固愆在小廉而可略惟今亞保乃昔司空
 有德者不必真除况臣無弼諧之德有勞者未嘗序進
 况臣無翊戴之勞直緣會過於一時遂假寵靈於三少
 自猶知其弗稱人豈謂之當然蓋取非其分則灾身而
 與過其宜則累國是敢懇：前疏之側且將切：累牘
 之中期道滿盈少逃譴責何上紆於宸眷復申戒於汝
 諧施重立山懼深淵谷伏望皇帝陛下持爵馭其臣之
 要稽賞延於世之文許以貴名馳之賤息如是則恩從
 隗始已毋廢於舊章民具尹瞻亦免干於新政臣之幸

也天必從之臣無任云：

奉御寶批降批答
不允仍斷來章

批答 倪思撰

省表具之孤棘之任專待勲德而不可序進卿言是
 矣夫以命世之賢贊親傳之策厥今勲德孰有如卿
 者乎矧輔弼之臣遭逢內禪稽諸舊典例進兩秩今
 自文階之冠升亞保之聯終一等耳朕方以未足酬
 卿為歎而卿懇辭不已顧欲馳恩毋乃執謙之過乎
 宜體至意勿復有請所辭宜不允仍斷來章

再辭免劄子

臣猥以凡才久事陛下於東宮今值君臨萬邦又得備

位宰輔其為榮幸殆非衆比覃霈所加臣何敢固辭惟是三孤重任與尋常遷轉不同非親非賢非有大功未始輕畀臣寔何人乃敢當此若謂恩由近始理難獨遺臣固已屢奏乞許回授倘蒙陛下曲從所請則是國之大慶非不沾被而况制命告廷人皆知陛下待臣禮意甚寵今者自緣揣分量才再三控避陛下不得已而聽之在臣居之則安於國又免僭賞其為大賜奚啻一官而已臣已再上表辭免謹具劄子申叙懇款必冀天慈即賜俞允臣無任惶懼俟命之至伏取進止

不允詔 倪思撰

勅某云：具悉朕於即政之始凡厥命令未嘗不謹而後出矧登進孤保褒寵台輔茲事體大顧豈輕易而發哉命出惟行誠難反汗而卿執謙不已是未諭朕意也至若馳思子姓必無官可進然後用此卿爵秩雖崇未云極品援以為說則又非宜其並欽承母稽成命所請宜不允

第三辭劄子

臣比蒙聖慈以覃恩特授少保雖名一官然與其他文階不同屢嘗面奏及於辭免表奏劄中具言只乞許臣回授兩奉詔書疊勤批答且宣諭再三未賜允俞臣感

激兢懼無地措躬以理揆之終非所據况留正元轉兩
官力辭其一臣若冒受公議謂何仰冀聖明允臣所乞
至如進封加食邑更不敢固辭乞令學士院貼麻施行
伏取進止

不允詔

勅某云：具悉朕於股肱大臣無所不致其厚矧國
朝以來位特進而爵亞保者止是次遷初非躡等况
卿羽翼朕於東宮弼諧朕之初政功德之茂誰復如
卿參稽典章稍陟位序未盡褒崇之禮寧虞冒受之
嫌遜辭沓來殊拂朕意亟宜祇受毋使人議朕於報

功而薄也所辭宜不允

第四辭劄子

臣此月九日面奏乞以轉少保一官許令回授恭聆宣
諭謂成命已行不必多辭臣繼具劄子陳述又蒙降詔
不允仰惟聖恩隆厚度越常格非臣糜捐所能報稱自
當祇承德意豈敢固執不移但臣正月間轉廳日已自
增秩三等僅及月餘復此峻遷非獨在臣私義難安實
恐名器輕假仰累初政此臣所以寧用煩瀆獲譴不敢
自恕而但已也伏望天慈特賜矜許止加封邑貼麻行
下臣意迫辭窮無任戰慄俟命之至取進止

辭免冊命劄子

臣比值覃恩進陞孤保懇辭六七面命再三雖已欽承寔深祇懼惟是冊拜未嘗舉行仰祈聖明許賜寢免冒瀆宸極臣無任惶懼俟命之至取進止

奉御寶批降詔宜允

允詔 倪思撰

勅某云：具悉朕始嗣寶歷褒崇輔臣考圖按爵秩卿亞保方詔有司卜良日序播紳於位列金石於庭備物典冊親臨軒而授之所以明貴也而卿處榮弗矜援比丐免顧忱誠之有素在謙德以采光茲用勉從益深嘉尚所辭宜允

乞序位在嘉王之下 三月

臣等伏見漢制諸侯王在丞相之上本朝太平興國八年十一月雖詔改定位序當時宰臣宋琪等固辭其後治平元年六月韓琦等亦嘗表請立班穎王之下蓋欲復古之制今者皇子嘉王封拜云初而臣等資望既非宋琪之比視韓琦輩又無能為役倘仍舊貫寔不遑寧欲乞序班在皇子之下庶幾稍協古誼如蒙聖慈俯從所請即乞批付閣門施行取進止

當日御批皇子嘉王某官品自有定制班

位當在宰輔之下所請宜不允

謝除少保表

臣某言伏奉制命授臣少保益國公加食邑食實封累
具辭免伏蒙聖慈特降中使賜臣批答不允仍斷來章
者天開禹績親承曆數之傳德愧尹躬叨被保衡之拜
控辭弗獲祇受為慚臣某 中謝 臣惟祖宗之盛時多卿
相之舊德勲業光於簡策聲名重於朝廷正唯爵位之
高允謂事功之稱如臣不肖敢企前修曾微一善之稱
偶際三朝之盛麟臺憲府早蒙高廟之親除螭陛綸闈
常侍壽皇之初政晚被中台之數再逢內禪之期首告
大庭超加異渥念覃霈自近司而始稽舊章無回授之
文跼踖拜嘉忸怩就列茲益伏遇皇帝陛下乾飛有作
離照無疆憐臣昔備宮僚久承恩獎謂臣今居宰席密
佐聖明特厚寵華式昭榮遇統百官而均四海已知任
職之難曰三孤而弼一人常究名官之義未知報塞徒
誓糜捐臣無任

謝重華宮表

臣某言伏奉制命授臣少保益國公加食邑食寔封者
執舜禹之中游敷大慶申臯夔之命首沐鴻私拜賜兢
營省躬戰栗臣某 中謝 伏念臣猥由孤賤獲際盛明辭
州縣之徒勞備師儒之遴選當紹興末綴臺諫之清班
暨內禪初預禁嚴之密侍寅緣簡擢揚歷高華戴恩憐

則山嶽為輕課績效則絲毫奚有旋叨大任遂陟冢司
惟三聖相承曠萬年而幾見顧老臣何幸閱一世而再
逢教正元朝士之無多念魯國靈光之獨在是容躡等
有愧踰涯茲蓋伏遇至尊壽皇聖帝陛下盛德難名成
功不處父有天下得神聖以親傳王居域中與乾坤而
同大眷茲駕鈍被以龍光况臣輔政十年受知最厚名
官三少在列所稀既未能退避於賢才又不獲日親於
間燕惟勉殫於臣節期力贊於君仁冀：之思諄：於
是臣無任

辭免講堂轉官回授劄子 四月十九日

臣伏蒙聖慈以臣曾任東宮講堂官依三月十七日指
揮轉兩官許回授者伏念臣頃聯禁從獲侍承華恩遇
最隆畧無補報今值陛下龍飛九五潤澤萬方興念舊
僚許以延賞是謂非常之幸會不世之異恩但臣備位
宰司叨塵已厚可以無取豈容傷廉欲望聖慈特寢成
命庶於分義或可少安干犯天威臣無戰栗俟命之至
取進止 奉御寶批
降詔不允

不允詔 倪思撰

勅某云：具悉卿昔以淵源之學導朕於承華今以
經濟之才佐朕之初政功既各異賞宜屢加姑俾馳

恩曾非過寵尚茲固遜殊咈至懷亟膺延世之休益
盡教忠之義所辭宜不允

辭免轉官公據劄子

臣近準省劄緣吏部以臣曾兼太子詹事具在東宮講
堂官項目內例轉兩官許回授臣即隨眾具奏辭免伏
蒙聖慈降詔不允方欲再陳之間今日吏部已給到公
據一道臣竊思講堂官專為曾講經讀史之人臣昨來
止是備員詹事其於講讀未嘗宣勞難以一例祇受此
理甚明欲望特降睿旨許臣繳納上件公據庶協於理
伏取進止 奉御寶批降詔不
允不得再有陳請

不允詔

勅某云：具悉朕念羽翼之舊勳厚股肱之殊眷勉
狗辭官之請故加貶子之恩已抑朕懷曲成卿美雖
謙言之游至顧大義以難從宜即欽承勿庸屢遜所
辭宜不允不得再有陳請

辭免親饗禮儀使支賜劄子

臣昨者伏覩親饗太廟都大主管所奏審支賜銀絹數
內禮儀使三節次各支七十兩足臣嘗面奏無功受賜
乞行寢免已荷天恩曲從所請即已貼去今準結絕所
傳奉聖旨依舊齋到賜目寔不違安欲望聖慈依已得

指揮許免祇受干犯宸嚴臣無任戰懼之至取進止

奉御

批不須多辭可特收受

乞去劄子 五月六日留身

臣輒傾丹悃上瀆宸嚴臣以至愚極陋之資遭時遇主致位二府月征日邁遂閱十年方為疑丞循默隨眾已負素餐之罪暨升次輔彌覺技窮爰自去冬懇祈罷免恭值壽皇聖帝將舉內禪未容遽去亦嘗奏知祇俟三數月間復申前請粵自陛下乘乾出震睿智日躋正藉宰司奉承教令俾群臣宿道鄉方於內萬民一新耳目於外然後治功可致聖德有光今臣乃以衰疲庸謬之

人玩歲愒日妨碍賢路仰辜陛下大有為之志公議籍籍久矣臣雖欲自恕其可得乎幸今親饗訖事使命成禮量能引分允也其時伏望陛下念邦棟之非輕察凡才之無用因其自列許奉外祠庶於去留之間明示意旨自然人心奮勵立懦廉頑初政急務大於此觸冒天威臣無任戰灼俟命之至取進止

乞去奏狀 五月六日晚附中使

右臣今早於榻前控叙危懇乞解機政願就外祠非敢率然有言遂欲輕去軒陛實緣揣分量才既難任重又當陛下政令維新久妨賢路恐悞國事所以決為退休

之計伏蒙聖諭諄：未賜矜許一日之間三勤宣押前
 無此例臣惶懼感激自當仰承威命曷勉就職但以輔
 臣舉措實係國體倏去忽留近於要君一致人言萬死
 莫贖欲望聖慈特回宸慮早賜俞允臣以表章不得通
 輒附勅使恭述忱悃且致再三之瀆臣來日亦未敢赴
 朝參不免家居俟命臣無任虔祈激切之至謹錄奏聞
 伏候勅旨

御批

卿父輔慈皇茂紆賢業茲求新政之益寔賴舊弼之
 臣遽上謙章曷副眷意

再乞去劄子 五月七日

臣昨具奏陳乞解罷機政伏蒙聖慈四遣中使宣押仍
 賜親札備形嘉獎眷留之意者伏以迫切之詞願還相
 印丁寧之訓特錫宸章隆體貌以有加過囊封而莫違
 恭趨法座游布危衷臣聞立政之初用人為本以明而
 陟當隆赫：之瞻有過則徵敢作容：之計矧在官僚
 之首當知進退之方伏念臣本乏才能可膺任使徒緣
 際會遂忝弼諧逡巡歲月之多積累愆尤之衆應酬庶
 務豈能事：以協宜甄叙羣才安得人：而盡善動常
 招於指目居每畏於譏評抱此兢慚凜乎朝夕憶壽皇

之初政倚康伯之舊臣曾未幾時猶辭大任矧微臣之
無似豈前比之可忘雖復少留迄將何補懼妨賢而悞
國非避事以謀身伏望皇帝陛下奮勵剛明照知情寔
既顯周邦之新命更憐秦府之舊人如公噐之傍牛與
天閑之駕馬久經服御今已衰疲姑全刀几之餘生任
適山林之野性茲惟大惠敬俟俞音干犯天威臣無任
激切俟命之至取進止

再乞去奏狀

臣屢披丹悃乞解機政聖恩隆厚眷留備至臣固應仰
體殊遇不當堅執愚見緣臣自計甚審宜去非一奏陳

之際拙訥未能盡宣須至滄瀆天聽臣聞祖宗時輔相
三二年間必須補外蓋權重則嫌謗易生位高則責望
尤衆今臣執政首尾八載宅揆已踰二年績效無聞罪
戾日積臣宜去一也酬酢機務全在精力臣六十之年
又過其四平時多病近者尤甚日所食米終二三合時
當盛夏猶服冬裘哀疾如此臣宜去二也資性懦弱無
經濟之才語言輕易非廊廟之具自叨大任衆論弗與
銜談巷議雜然議之播紳公言亦可想見臣宜去三也
聖明御極日新庶政易置輔臣古今常理壽皇初載陳
康伯尚不敢久留而况臣乎蚤蒙聖諭謂康伯求去月

日不如是之速蓋是時康伯獨相又有人望所以稍緩
今右揆賢德中外具瞻而臣望實不孚每招議論幸親
饗訖事使容成禮正當策免已備列於初奏臣宜去四
也今春蒙壽皇曲留即嘗奏知勉強數月輔陛下之初
政即避賢路今當踐言難復固位臣宜去五也凡此五
者並非飾詞何待臣言難逃聖鑒惟有二事亦合詳奏
臣備數東宮閱歲滋久既陛下諄：以為諭在臣豈無
戀主之心然而當軸處中非恃恩之地尸祿素餐或致
彈劾陛下雖欲不加譴斥如公議何孰若因其有請保
全終始以重國體此一事也其一事則自右遷左賜位

特進寔為僥倖但以條例當然不敢獨辭未幾陛下登
極首叨覃轉遂冒孤棘又緣累朝故事此恩無終辭之
理不免汗顏祇受今若奉身而退則名器豈容虛假倘
蒙聖恩幸許其去只乞以原官奏祠猶可少弭人言粗
安分義臣之肝膽盡於此矣伏望天慈早賜處分施行
謹錄奏聞伏候勅旨

辭免除職判潭州劄子 五月八日

臣近疊具奏乞罷政奉祠今聞已降制命除臣觀文殿
大學士判潭州臣誠惶誠恐不知所措竊惟秘殿隆名
長沙鉅鎮兼舉以授必惟其人如臣者任職居官碌：

無補迫於衰病仍懼滿盈引分丐閒良非獲已敢謂陛下曲全體貌眷撫有加終兩日間宣押再四惟茲異數近比所稀今又加職典藩寵榮其去在聖主禮意則厚矣恩德則深矣愚臣自揣其何敢當所慮招致煩言仰辜鴻造伏望聖慈收還成命止授外祠庶令進退之間不失辭受之義干犯宸扆臣無任戰栗俟命之至伏取進止

不允詔 倪思撰

勅某云：具悉朕待遇股肱優禮體貌既懇辭於重任必寵賁以徽章非惟答其輔贊之勞亦以光其進

退之節卿朕之舊學國之元臣四近周旋宣勤踰於十載兩朝授受策勳茂於一時茲解繁機爰加異數峻延恩之秘職專帥閫於上游庸便乃私且榮其去亟膺渙渥宜畧謙撓所辭宜不允

再辭表

臣某言近具奏辭免新除觀文殿大學士判潭州恩命伏蒙聖慈特降詔書不允者保全其去已銜莫大之恩寵賁其行敢冒甚優之禮雖溫言之俯暨終危慮之難安臣某 中謝 伏念臣本乏寸長叨聯近弼當聖主初承於丕緒審愚臣絕企於清光懼干誤國之誅亟上乞身

之請陛下厚黃闈之深眷記青宮之舊僚留臣非不堅
待臣非不至其如內愆私義外畏公言縱欲強顏抑將
何補茲用敷塵於淵聽庶幾俯鑒於精誠方當覆餗之
凶詎意觸藩之吉豈謂伏蒙皇帝陛下仁心恤隱聖度
包荒拔之險陷之途置之安寧之地其為感德固已淪
肌至於通籍殿中分麾閫外極輔臣之異數須元老之
壯猷猥被妄庸定貽顛沛願勅還於前詔姑幸畀以外
祠身在江湖縱復去天之遠忠存猷畝猶肩報國之心
重此陳詞期於遂志臣無任

同日奏劄

臣今年正月壽皇聖帝欲移御重華宮委臣討論典禮
面許錫賚昨日蒙差使臣齎賜酒器二百兩并清馥薰
衣香共五十貼新茶兩種臣不敢辭免即已祇受本俟
朝辭日敷奏今既聞言官論列恐未必得望清光合具
奏知仰乞睿照

重華宮奏劄

五月八日

臣迂踈駑下積緣幸會一自壽皇聖帝陛下初臨大寶
即蒙擢侍螭坳由是封植任使徧歷華近以至二府天
地之恩莫可量度正使碎首捐軀安能圖報萬一近者
陛下決策內禪凡百典禮盡出睿謨臣偶備宰司預聞

意旨初無一語可助討論今緣輔政非才乞解機要兩朝大恩未酬毫髮非敢潔狀而去實由衆論不容恐洎致煩言有傷國體姑欲自為去就豈謂聖慈記向來欲加錫賚之語親御翰墨申異數尚方金器御府香茶皆非微臣之所當得君賜至重不敢輒辭惟當退夸閭里以侈榮遇傳之子孫世世報德臣見今辭免新命候三數日間朝辭面奏皇帝乞詣宮謝辭尚望矜念犬馬舊臣許賜宣引臣無任瞻天荷聖感激惶懼之至

乞以元官奉祠并免謝辭劄子 五月九日

臣已具奏辭免加職典藩見在城外恭俟威命尚有忱

悃須至奏陳臣乃者備位輔臣適緣幸會值陛下做臨大寶叨冒覃轉進位亞保臣固嘗懇辭六七曲蒙聖訓丁寧必令祇受臣亦檢照累朝典故惟此非常異恩宰司無回授之例雖已承命每不自安今既得請罷政乞還此官於理無嫌欲望聖慈止令以舊秩奉祠庶安愚分所有謝辭一節緣臣罪戾至多深恐言者攻擊未已必疑臣朝辭之日妄有陳述仰惑聖聽臣將無以自明愈重其罪伏乞併賜處分施行取進止

五月九日御批免朝辭在外宮

觀任便居住

謝除醴泉觀使表

臣某言伏奉勅命差臣充醴泉觀使在外任便居住臣已望闕祇受遥謝訖者用踰其分宜俾民瞻詔許其歸尚均祠佚恩與天而同大感無地以寄言臣某

中謝伏

念臣猥以妄人生逢昭代不自量其才力乃過竊於寵榮久合投閒夙嘗控請屬飛龍之聖作疇不歸心雖老馬之力疲詎忘戀主少需三月方敢一言悞蒙英睿之知優假弼諧之禮王人疊至親札下頒凡可示於留行已畢全於故寔逮清議弗容之際猶隆私未替於初所愧冥頑仰辜化育茲益伏遇皇帝陛下待人以恕馭下惟公念臣早侍元良深致保全之意知臣自貽衆怒難

專予奪之私聽辭湘水之麾俾領祥源之使擢髮不足以數愚臣之罪捐軀不足以酬聖主之仁惟憑香火之緣上祝乾坤之筭臣無任

重明節開啟疏

天祐聖神方啟萬年之祚人輸頌禱敬歸兩足之尊矧誕節之肇臨宜勝因之多助皇帝陛下伏願功高文命養備重華中國有至仁舉梯航而畢集西方無量壽極算數以難名臣無任

重明節進功德疏右語

天開昌運時誕明君嘉節倣逢輿情胥抃披三旬之釋

典祝萬載之堯年皇帝陛下伏願道冠百王功成一統
河沙可數大福無窮曆象易推修齡難測施及華夷之
衆同躋仁壽之期臣無任

重明節賀表

臣某言伏以萬呼萬歲俶臨萬宇之朝日近重陽肇立
重明之節邦家大慶夷夏同歡臣某中賀恭惟皇帝陛
下德冠古初仁周品彙將旦而群陰伏寢以明昌得秋
而萬寶成俾茲熾大自今伊始有億斯年臣又沐鴻恩
驟違丹陛夢尋園綺猶進旅以陳篇目斷夔龍阻隨班
而上壽第堅請祝寔倍常均臣無任

重華宮會慶節功德疏右語

伏以積二十七祀之仁恩民誰不被享億萬斯年之鴻
筭理有必然茲因誕節之臨更效封人之祝至尊壽皇
聖帝陛下伏願與天無極如日常中金母長生永對慈
闈之養玉卮稱壽坐觀聖王之朝臣無任

重華宮會慶節賀表

臣某言恭遇十月二十二日會慶節者伏以褰裳高蹈
仰黃屋之非心統電載臨效華封而祝聖雖曰雲天之
遠居然葵藿之依臣某中賀恭惟至尊壽皇聖帝陛下
御衆以仁事親惟孝委成功而弗處玩至道以自怡九

重備養而儉德愈彰太極彌尊而謙光滋著昔君一或
得此尚為有道之長今我兼而行之宜享無疆之壽臣
屏居外郡欣際昌辰望東內以馳情指南山而申頌臣
無任

冬至節賀表

臣某言伏以七日之來禮方隆於亞歲萬年之祝時正
紀於初元居然有截之區同此無疆之頌臣某 中賀恭
惟皇帝陛下得天之統如日之常治格豐年何待占雲
之邈人安化國自應測景之長陽德方享聖圖益廣臣
奉祠跡遠存關心勞雖歎舞之無階在葵傾而敢怠臣

無任

歷官表奏卷第九 終

歷官表奏卷第十

周益文忠公集一百三十一

紹熙元年

年節賀表

臣某言伏以陽遇三而成泰時謂人正聖以一而為元
 肇新歲紀群方來賀庶物皆春臣某中賀恭惟皇帝陛
 下以德施仁順時布治始初之政應天地之發生寬大
 之書協祖宗之溫厚明繼明而方永朔復朔以奚窮臣
 驟遠馭搏倣更鳳曆夢想臚傳之禮阻陪特揖之班徒
 竭寸誠仰祈萬壽臣無任

重明節祥符寺開啟疏

電統紫樞啟真人之震夙經緇紺宇集妙果之莊嚴是
資彌月之勤庸効後天之祝皇帝陛下伏願壽隆無量
福極難名轉聖王之四輪咸依天覆歷賢劫之千佛永
保君臨

重明節天慶觀開啟疏

帝圖有永逢上聖之膺期道力無邊紓下情而致禱集
琳宮之淨侶慶甲觀之昌辰皇帝陛下伏願如日照臨
體天覆燾壽考越萬年之久子孫開千億之繁夏清冬
溫永奉北宮之養丁躔丙度常占南極之祥

重明節進功德疏右語

祝聖者三華封尚爾俾壽之萬魯史猶然矧嘗密侍於
清光茲幸親逢於誕節罄丹衷之切至蘄鴻筭之延長
皇帝陛下伏願如佛獨尊與天同大三千爾_世界咸歸有
道之邦億兆斯民共洽無為之化丕隆親養彌永皇圖
重明節賀表

臣某言恭遇九月四日重明節者伏以卿雲彌館夙開
三日之祥瑞露承囊載紀千秋之節兩宮胥慶群辟交
欣臣某_中賀恭惟皇帝陛下保合太和綏寧中夏修文
偃武運天地之神心薄斂省刑傳祖宗之家法積此無
窮之澤儲為有羨之休齊久照於義舒邁永年於冀翼

臣早塵附鳳今際流虹屏迹江湖第遙瞻於太紫精心
香火竊自比於緇黃

重華宮會慶節進功德疏右語

天錫慈皇之壽以莫不增民懷聖父之仁其何能已虔
敷秘典仰贊昌辰至尊壽皇聖帝陛下伏願以無為之
化丕冒群生以不宰之功常居太極列真千佛共儲有
羨之齡諸夏百蠻永效無疆之頌

重華宮會慶節賀表

紫禁高居受寧親之至養赤光下照標誕聖之初期凡
在含生舉深善頌臣某 中賀 恭惟至尊壽皇聖帝陛下

仁明毓德揖遜成功瑞符壽母之祥寶婺肇魯孫之
慶載臨令節丕洽宸歡冕旒初奉於瑤卮方歲萬年之
盛郡國倣均於鎬晏益彰二紀之謙臣身也奉祠心焉
存闕徒因彌月之旦申詠後天之詞臣無任

冬至節賀表

臣某言伏以剛為天德既反則亨陽主歲功其來為復
適觀道長胥慶君臨臣某 中賀 恭惟皇帝陛下圖大宅
中順時布政仰占乾度會七曜於太初俯應人和合八
能於前殿無疆之祝有截所同臣名玷內祠身縻寒谷
企望堯雲之遠欣逢舜日之長臣無任

辭免判隆興府劄子

臣今月二十日準尚省書劄子十月二十七日三省同奉聖旨周某可判隆興府免奏事疾速之任臣聞命震恐無地措躬伏念臣庸愚不肖本非可用之才而冒恩最久受任至重不能悉心竭力徒知竊位素餐日往月來辜累山積向非陛下念其簪履之舊力賜全存則臣蝼蟻微生當膏鈇質豈容尚尸厚祿安處故里日夜慙懼無以仰副天地父母之隆施今者特蒙拔拭畀以藩方恩旨一臨如蹈淵谷深惟上流重地選用匪輕如臣負罪嬰譴加之素有心氣之疾年齒遲暮浸以昏忘驟臨民社必速顛隳量力自言非敢備禮伏望睿慈俯矜誠悃亟收前詔上以全聖主始終之賜下以免微臣冒昧之誅未泯餘生別圖報効臣無任虔祈激切戰栗俟命之至取進止

貼黃

臣重念豫章督府難久闕守緣臣聞命辭免已越累旬決無冒受之理欲乞便賜俞允免致再瀆威尊有妨謀帥臣不勝幸願

十二月十一日
御批降詔不允

不允詔 倪思撰

勅某云：具悉遠稽周室之用賢有若召公之為保

明南國之教所以宣德澤而旁流分西陝之權所以
強形勢而內輔乃今謀帥視昔同符求諸九棘之班
付以十連之寄謂宜即日以之鎮尚且抗章而力辭
惟時价藩難久闕守其稟已行之命亟慰來暮之思
所辭宜不允

年節賀表

臣某言伏以七政旋觀爰接龍杓之宿二儀交泰重頌
象魏之

緩星拱臣某 中賀 恭惟皇帝陛下

下懋昭聖治推廣仁心百姓群黎均被發生之德五戎
六狄咸依覆冒之恩受福無疆降年有永臣久茲伏隕

邈矣造庭但同皞皞之民共樂熙熙之化臣無任

再辭免判隆興府第二劄子

臣近具奏辭免判隆興府恩命正月二日恭奉十二月
十二日詔書所辭宜不允者臣稽首祇拜以還感極至
於流涕自當欽承威命即日啟塗庶因蕃宣圖報萬一
實緣臣衰年抱疾力不能勝是敢罄竭腹心游干淵聽
伏念臣奮身鉛槧本無才畧受爵不避遂至超踰粵自
投間以來追思平昔叨竊過分毫髮無補常疑天刑人
禍難乎幸免迨聞起鎮將恐將懼心氣宿疾因此轉甚
而又寒入腰膂步履艱窘飲食減少日就羸瘠稽留詔

書無地措躬假令扶憊赴官以兢憂之心彊疲懦之質
凡所施設決至差謬上流重鎮豈容養疴何待旬月定
干大戾在臣既乖不能者止之誼又使一邦徒費將迎
其罪愈不勝誅矣臣亦仰揆聖意或以臣嘗侍左右誤
被簡知不欲使之久間特畀鄉部以示光寵是陛下施
惠於臣者至深至厚苟非心勦形瘵如前所陳則臣何
敢固為辭避抵冒嚴譴伏望聖慈深賜矜察即降處分
許臣仍舊奉祠脫之進退惶迫之中寘之保全安佚之
地此為恩德胡可勝陳碎首捐軀尚期異日黷犯天威
臣無任戰栗俟命之至取進止

允詔

倪思撰

勅某云：具悉入居輔弼出任蕃宣大臣之職也卿
上相印而奉祠館再更歲籥朕念其久間起鎮鄉部
恩遇之渥謂即欽承抗章控陳却而復至情辭懇切
弗從得予勉狗雅懷不忘眷注所辭宜允

繳勅書銀合臘藥狀

右某昨準進奏院通到勅書一道賜銀合臘藥係是前
宰執判隆興府江西安撫使恩數緣當時辭宜允謹免
恩命未敢祇受已權寄吉州軍資庫今來已奉詔書所
辭宜允謹具狀申尚書省乞賜敷奏將上件勅書銀合

臘藥赴所屬繳納伏候指揮

重明節進功德疏右語

右伏以天錫明君丕享萬齡之筭人歸聖德咸輸三祝之誠假梵釋之薰修助海山之深峻皇帝陛下伏願自彊自乾之健久照如離之明重譯效於貢珍兩宮隆於榮養域中而王居一執道紀以長生天下而我獨尊等佛身之無量臣無任

重明節賀表

大火德炎是生真主重陽節邁載紀誕辰罄夷夏以來同與乾坤而等久臣某

中賀

恭惟皇帝陛下道齊堯舜

功邁禹湯發於言者固匪仁言施於政者無非仁政是以兵寢刑措編氓舉安時和歲豐生齒日衆積億兆人之就望宜萬千歲以熾昌臣攀附有初禱祈滋切容光日照雖悵於戴盆所欲天從竊同於窺管臣無任

重華宮會慶節進功德疏右語

右伏以燃無盡之燈久符久照按長生之籙敬卜後天凡戴德之斯民舉竭誠於是日至尊壽皇聖帝陛下伏願鴻基益固睿筭彌增三面網開何取唐宮之獻太元筴授永觀漢殿之卮臣無任

重華宮會慶節賀表

日會折津風推良月星流華渚茲應昌期凡居有截之
區同罄無疆之祝臣某 中賀 恭惟至尊壽皇聖帝陛下
功成弗處道大難名不獨親其親孝與慈而並廣為衆
父之父理暨性以兼融巍然太極之尊永矣溥天之養
聖謨可頌睿筭難窮臣竊伏江城欣逢誕節望重華之
殿旅百何從想萬壽之山呼三罔怠臣無任

辭免除觀文殿學士判潭州劄子

臣九月六日準省劄八月十一日三省同奉聖旨周某
可除觀文殿學士判潭州龍光狎至榮懼交深臣仰惟
秘殿之職有三紫宸居首大藩之名不一南楚為雄惟

譽望素高者許綴其班惟恩威兼著者始堪其任如臣
抱虛竊寵浮實起羞進無可施之能退有未補之過獨
荷聖心之簡記每紆皇眷以慈憐方辭鄉部之麾又畀
隣封之帥更聯禁直加賁頽齡顧私心猶不自安在公
論必難衆允伏望陛下垂矜舊物深鑒危衷曲全終始
之恩特寢便蕃之命間官厚祿願樂於聖慈時異數名邦
免妨於賢路所有除命臣未敢祇受冒瀆天聽臣無任

云：取進止

奉御筆批
降詔不允

不允詔 李燾撰

勅某云：具悉朕宗咨舊輔寵遇碩儒秘殿隆名所

以增華於賢望南邦雄鎮所以倚重於英猷卿夙秉
 機衡又安館圉茲藩垣之中命尚函牘之懇辭夫臣
 嘗作於股肱何靳四方之宣力且治已均於邦國奚
 難九牧之阜民矧如洪化之訏謨或稱延恩之優禮
 誼無可避令在必行往並體於淵懷庸勉圖於美績
 所辭宜不允

再辭免劄子

臣近具奏辭免新除觀文殿學士判潭州恩命伏奉九
 月二十日詔書所辭宜不允者聖恩天大負荷已難詔
 旨春溫兢榮滋劇伏念臣以百無所堪之才而久竊甚

高之位以萬分未報之德而更受非常之知苟可效勤
 殺身奚憚今者畀之美職付以名藩任使優隆豈應辭
 避緣臣去冬特膺宸眷起鎮豫章自度無方面之才有
 心氣之疾物情未與顛沛是虞疊控忱誠願安閒散逸
 蒙從欲賜以保全僅歷三時復頒異數隆恩加厚衆或
 無他然臣揣分量才自當知止况始終泰劫既殊先迷
 後得之義而衰病侵陵又非昔疾今愈之時儻冒寵光
 必貽罪戾伏望陛下察臣行能之無取憐臣筋力之既
 憊不以名器假非其人不以藩翰授非其任收還誤渥
 改命實才未隕餘生必期稱塞臣無任云云取進止

御奉

筆批降
詔不允

不允詔 倪思撰

勅某云：具悉卿上相印之初朕固嘗寵以紫宸峻職畀之南楚帥權矣維今之除蓋申前命既本朕之始意無復人之間言比覽遜章已詳諭旨謂開藩之云久何引道之尚淹且卿昔力辭猶為有說茲為固避是乃過謙勉煩寅亮之賢往重方維之望亟其之鎮宜止控陳所辭宜不允不得再有陳請

三辭免劄子

臣近兩具奏辭免觀文殿學士判潭州恩命疊蒙聖慈

降詔不允不得再有陳請者臣自惟犬馬餘生何以當天地曲成之造如此蓋陛下記臣頃因罷政嘗有是除俯眷舊人迄申前詔臣既合仰體德意又長沙闕守已涉累月今來更不敢辭避見一面起發之任惟是殿維列職近臣高選方茲起廢異乎勸功况臣祿秩已優足假寵以臨民吏豈應更冒殊渥自招滿溢之災欲望皇明照臣悃悞特頒睿旨姑寢除職之命俟他時治郡不至瘵曠然後賜以褒陟則公朝予之為有名微臣受之為有說免令非據或致疾顛屢竇天威臣無任震懼祈懇之至伏取進止

十一月十四日三省同奉聖旨依已降詔不允不得更有陳請

冬至節賀表

敬奉天時順周正而發政躬修郊報即漢時以陳儀喜
浹華夷恩漸動植臣某 中賀恭惟皇帝陛下懋昭仁孝
獨運聖神百姓德教之加灼知聖治萬邦豐年之委永
底農功履陽復之昌辰介天齊之曼壽臣久違班列屬
剖藩符弟同富庶之民共樂舒長之景

郊祀禮成賀表

臣某言恭聞郊祀大禮慶成者三歲親祠雖存彛制一
純自薦尤在初郊猗大典之告成紛群方之來賀臣某
中賀臣聞中和立極然後禮樂可以格神德政養民然

後粢盛可以事帝是為中外之相應豈特儀容之可觀
恭惟皇帝陛下躬堯舜之仁懋禹湯之儉省刑以彰王
化薄斂而裕人生肆迎景至之長丕闡國南之祀歸功
高廟預殫尊祖之誠獻胙慈庭亟展事親之孝情文交
舉古昔罕聞臣祇赴侯藩欣逢邦慶端闡肆眚班草綴
於朝紳宣室受釐夢徒游於帝席臣無任

潭州謝上表

臣某言先準告命除臣觀文殿學士判潭州已於十一
月二十日到任交割職事訖者除音中出兼內朝外間
之榮詔旨下頒趣新組舊封之拜戴洪私之浩蕩即便

道以馳驅俶見吏民敬宣德意臣某 中謝 伏念臣初微
一善獲事三朝高廟疑其有小才儲之臺閣壽皇察其
無大過試以鈞衡會宸極之天臨念宮僚之歲久弼予
新政咨汝舊人而力不逮於初心望不孚於衆聽懇辭
鼎軸隨困風波蒙全度之深憐竊優閒之厚祿桑榆景
逼惟甘嬰疾於清漳葵藿心傾未忍掛冠於神虎詎期
軫記頻下恩章姓名復齒於殿帷委寄仍還於湘部謂
昔之銷印重違白筆之公言故今者剖符明示清衷之
本意跡類馬門之復夢成鹿野之真載揆哀殘若為稱
塞茲蓋伏遇皇帝陛下用人由己篤舊惟仁吉庚異命

之申晝日康侯之錫接餅罌雖溢猶施挹注之功牛馬已
疲尚備服乘之數臣敢不思酌睿獎勉布寬條豈能待
三年而有成或庶幾一日之必葺在前智畧悵往謬之
難追治郡功名期後圖之允懋臣無任

郊祀謝赦表

臣某言準都進奏院遞到赦書一道為郊祀禮畢大赦
天下臣即時集本州官吏軍民望闕謝恩宣示施行訖
者肇禋三歲丕昭莫大之儀肆眚萬方誕布惟新之澤
若民與吏式舞且歌臣某 中謝 臣聞好生者上之所先
多辟者下或不免堯舜衣冠之畫教猶弼以五刑成康

國圖之空法亦施於三宥於皇昭代尤廣惠心率於大
祀之竣隨以龐恩之施恭惟皇帝陛下精誠內罄法度
外彰欽崇郊廟之文丕冒華夷之衆福其錫汝敷皇極
於箕疇過曰在予富善人於周賚惟道以德故有耻可
格惟協於中故無刑可期臣久侍威顏灼知聖意甫效
駑才於方岳適逢鴻霈於園立誓殫宣布之勤仰副緝
熙之美臣無任

郊祀禮成謝加食邑表

臣某言伏奉制命以郊祀禮成加臣食邑一千戶食寔
封四百戶者分土武安阻侍壇垓之饗宣麻文德首叨

井地之加省已無勞拜恩有覲臣某

中謝

伏念臣奮由

羈賤積冒寵榮猷受一廛本為於織席侯封萬戶方極
於布衣茲逢祭澤之行更衍封租之入此蓋伏遇皇帝
陛下事天寅畏馭下寬仁單誠意於初郊均神休於率
土雖在江湖之遠亦頒綸綍之新承惠長沙敬想孝文
之問稱忠甲令敢晞吳芮之賢臣無任

高宗加上謚號賀重華宮表

臣某言伏覲都進奏院報十一月二十四日加上高宗
受命中興全功至德聖神武文昭仁憲孝皇帝徽號冊
寶禮成者肇講郊禋追崇祖德垂鴻億世底豫三宮凡

在照臨惟胥鼓舞臣某 中賀 臣嘗博稽盛帝疇若高宗
異時德壽之宮屢增榮號今日顧成之廟益薦徽名恭
惟至尊壽皇聖帝陛下揖遜功高顯揚志切曆數命禹
坐觀子述之明美墻見堯居致時思之孝茲邦儀之告
備宜聖意之允諧臣分土攸拘班庭莫遂逖傳盛典徒
驚寸心臣無任

賀皇帝表

臣某言伏覩進奏院報十一月二十四日加上高宗受
命中興全功至德聖神武文昭仁憲孝皇帝徽號冊寶
禮成者我祖萬邦之君名已昭於太室先庚三日之吉

號復衍於初郊縟禮時成含生風動臣某 中賀 高宗皇
帝受天明命享國永年解三萬言難盡放勳之稽古加
十六字將同藝祖之開基恭惟皇帝陛下寅紹邦圖顯
揚世烈合華夷之公願闡今古之彌文消休假廟之前
具嚴典冊展慶受釐之後底豫神人臣祇役蕃宣逢辰
昌盛莫預鋪張之列惟思希曠之儀臣無任

賜銀合臘藥勅書

倪思撰

勅某卿國鈞舊秉帥閩新臨當凝凜之屆期宜冲和
之加衛俾頌珍劑庸示眷懷今賜卿銀合臘藥至可
領也故茲示諭想宜知悉冬寒卿比好否遣書指不

多及

謝表

臣某言準都進奏院通到勅書一道賜臣銀合臘藥臣已望闕遙謝祇受訖者雲章封璽寶劑實奩適屬凝嚴頓蘇疲瘵臣某中謝伏念臣甫從間散起備蕃宣雖恪守於官箴曾未除於民瘼豈圖宸渥爰舉邦彛詔塗芝檢之黃光於下澤藥按桐君之錄滋以上池手披出綵之溫心失折綿之凜此蓋伏遇皇帝陛下慈憐臣庶軫念藩維已施起廢之功更廣蠲痍之賜恩勤至矣報稱謂何臣謹當六尚之珍良察一方之疾苦乃身無恙敢

獨享於君仁所部有瘳期咸霑於聖惠臣無任

賜紹熙三年曆日宣

太史局進納到紹熙三年曆日今賜潭州守臣

右宣令潭州守臣準此

紹熙二年十一月二十四日

謝表

臣某言準都進奏院通到宣一道賜臣紹熙三年曆日一卷已望闕謝恩祇受訖者閏月定四時爰及三年之閏春秋大一統是頌萬國之春稽首窺文悉心布治臣某中謝恭惟皇帝陛下璣衡齊政曆數在躬歲更始以

專農明昭先務王求端而得正誕著新書將令志慮之
孚豈獨典常之舉若時宣化屬在守封臣敢不仰體聖
心俯勤民事天監厥德方婁格於豐登職思其憂當益
加於勸課臣無任

紹熙三年

年節賀表

臣某言伏以元會歲儀仗入龍樓之曉孟陬占象曆新
鳳紀之編夷夏來同堪輿協慶臣某 中賀 恭惟皇帝陛
下乘乾之健出震而亨孝備愛欽浹三宮之和氣書頌
寬大轉四海之仁風於萬斯年自今以始臣久違班著

俶布藩條春見曰朝徒想北辰之拱閨餘成歲敢稽東
作之平臣無任

問聖體劄子

臣恭聞去臘之初皇帝陛下暫親藥餌隨喜康和既獲
助於天人宜駢臻於祉福臣身縻符竹夢想闕庭望天
日之光莫陪朝列見羽旄之美更想都人謹具手劄起
居以聞伏乞睿照

賀御殿劄子

臣比者恭聞皇帝陛下肅理之間節宣徽奕神明所相
今已痊平日御延和裁決萬務無疆之慶有截同歡臣

伏限守郡在遠不獲蹈舞闕庭臣無任

辭免復觀文殿大學士劄子

臣竊觀進奏院報已降制命復臣觀文殿大學士者恩光滋厚愧恐兼深伏念臣頃去周行嘗叨峻職審僉諧之弗契因懇避以獲從逮起鎮於藩方併通班於殿陛超踰已甚褒陟則那載惟有道之朝詎假無名之寵謂臣偶經郊霈則已疏千戶之封謂臣忝佩郡章則未奉三年之計反復敢當於大號初終盡守於小廉伏望皇帝陛下重爵秩以勸功謹器名而馭下念昔者本非宜得在今茲何以復還鑒多懼之危哀收再頒之渙渥身

聯禁籍尚奚假於升華名洗刑書難更膺於進律所有復職恩命臣未敢祇受干冒疏宸臣無任兢惶俟命之至取進止

不允詔 李燾撰

勅某省所奏劄子辭免復觀文殿大學士恩命事具悉朕矜懷元老寵遇鴻儒任重帥藩方懋股肱之力班宵書殿益昭體貌之恩卿學與器宏望瓌實茂自釋秉鈞之勩荷膺宅牧之求惟紫宸肇創於隆名在皇祐本優於舊相矧貳公夙建蓋華職之兼崇而明旨又頒偶遜章之曲徇茲申成渙亶協僉言當祇服

於顯徽尚莫煩於撓扼所辭宜不允故茲詔示想宜知悉夏熟卿比平安好否遣書指不多及

辭免復觀文殿大學士表

臣某言近蒙聖恩復臣觀文殿大學士尋具奏辭免準進奏院遞到詔書一道所辭宜不允者思隆申命加一字之袞褒禮重馭臣下十行之重札將力回於譎寵敢遽止於牢辭臣竊以文殿大名儒紳異數他學士皆為隔品今朝廷方且虛員孰謂畸人獨叨睿獎伏念臣積塵美仕久負殊知尸祿素餐在宿愆而莫益牧民御衆曾來效之未伸寵靈驟降於叢霄震懼實深於丹臆雖

君制命而臣承命當即拜於絲綸然天虧盈而神害盈合游殫於惴惴伏望陛下力持公道參考私情收渙渥於已行免疾顛於非據儻異日曠瘼之或逭則盛時勉勵之有名恭布忱言伏須允報臣無任云云
奉御筆批降詔不允

不允詔 李燾撰

勅某云：具悉冠裳祕幄蓋乎中外之瞻優寵舊鈞尤繫重輕之體卿以真儒之學濟上賢之才藩閫雖分心固存於廊廟謀猷益著眷宜厚於臣工茲繇華職之陞屢覽冲章之至謙得之柄在雅志以甚高名

實之賓豈公朝之敢廢其承深詔勿復牢辭所辭宜不允

謝表

臣某言伏奉制命復臣觀文殿大學士尋疊具辭免特蒙聖慈再降詔書不允不得再有陳請臣已望闕謝恩祇受訖者紫蓋分麾甘後循良之吏青規進直猥先侍從之官既假寵於藩維亦增華於儒紱臣某中謝伏念臣始塵科級即蓬英躔舟每至於蓬瀛光仍依於日月晚逢新政深眷舊僚寬策免之常刑畀詔除之異數雖自弛僅二年之久而簡知蒙兩命之加假征鎮之中權

還殿庭之右職進之犬雞之效顏方劇於汗顏司存雨露之邊地彌高於清切紛盛世賢猷之眾獨微臣榮遇之多遜避弗俞兢慙罔措茲益伏遇皇帝陛下天臨萬寓我澤如春思湛恩之汪濊爾身在子視羣工外憐復玷之難難命靡憚於重申賞無嫌於寧借臣敢不欽承鴻渥益厲素心三省昨非當力圖於今是再叨大受滋有愧於小知誓殫宣布之勞仰報初終之賜臣無任

賜銀合夏藥勅書

勅某卿望重舊鈞任隆巨屏茲屆炎歊之盛方宣勞勸之多其錫珍良以昭眷顧今賜卿銀合夏藥至可

領也故茲示諭想宜知悉夏熟卿比好否遣書指不
多及

謝表

臣某言準都進奏院遞到勅書一道賜臣銀合夏藥臣
已望闕遙謝祇受訖者日長星火軫侯國之炎曦言出
絲綸頌方丞之珍劑仁深扇暘恩釋負茲臣某 中謝伏
念臣自遠雲龍之庭常憂狗馬之疾比承詔獎來布藩
條風雨晦明茅謹天時之順參苓挂朮實慙藥籠之須
窺綠字以欣榮啟寶匱而兢懼茲益伏遇皇帝陛下哲
臻煥若怨息暑咨方申命義叔之時眷南巡衡山之境

靡忘加惠庸賁守封臣敢不推廣上心勤求民隱與魏
君之五色允有光輝稽周典之十全庶無疾疢臣無任

降郡公謝表

臣某言伏奉制命以臣舉常良孫改官犯入已贓降榮
陽郡開國公臣已望闕謝恩祇受訖者舉廉而濁如泥
分甘嚴譴擇士而削以地恩畀寬科目睹制以兢慙手
植圭而戰栗臣某 中謝伏念臣幸緣復職例許薦員知
公朝改秩之嚴乃忘體國知聖主去貪之切乃昧表民
况嘗尸南曹典選之官且久預東府掄材之數衆方責
備理合求全用門閥以取人孰云盜璧近闕庭而試吏

何至攫金厥既伏辜自應連坐雖國除而郡降居二品之中然爵賜其鄉猶在諸侯之上戴包荒之大德懷撻市之深羞茲益伏遇皇帝陛下提挈四維抑揚百辟賞受上者每至勸於進賢刑無小焉宜必懲於故犯聊從薄責將使厚顏臣敢不循省譽尤圖惟報效職由獄吏已示敗於延年命錫卻卿尚晞功於白季臣無任

重明節進功德疏右語

右伏以誕彌厥月昭電統於虹流於萬斯年頌天長而地乂載緒玉笈之字有衍赤精之符皇帝陛下伏願順慶垂基惟皇作極永錫難老為上古之大椿申命用休

增泰元之神筭臣無任

會慶節進功德疏右語

右伏以宜君皇：高脫屣於萬乘為衆父：垂綠鑑於千秋大集殊因丕延多歷至尊壽皇聖帝陛下伏願文齡有永舜壽無疆驗太史之書老人常見於南極誦宣尼之語衆星長拱於北辰臣無任

會慶節進銀奏狀

伏以萬年億載之歡載臨誕節四海九州之養咸備慈庭叨預守封敢稽報上前件物坤珍所效邦賦攸資瑞溢商山知利源之不竭貢輸衡嶽符壽祉之彌堅所有

戶部奏卷十
臣官表奏卷十
銀一千兩謹隨狀上進冒瀆宸嚴臣無任

冬至節賀表

臣某言伏以雷居地復日在巽維應周統以得天藏魏儀而亞歲臣某中賀恭惟皇帝陛下剛明顯著仁愛敷施七日閉關心法乾坤之施八荒開域壽同夷夏之躋茂履昌期駢臻純嘏臣身縻方郡迹遠嚴宸徒瞻迎送之雲共樂舒長之景臣無任

丐祠劄子

臣輒瀝愚誠仰干睿聽伏念臣猥以凡才荷陛下簡知特異固非一日乃者輔政無狀引分丐閒衆言交擊罪

在不測獨賴天地覆載委曲保全寘諸安閒之地閱時未幾記錄有加美職名藩舉以授之臣感激恩遇所以圖報謂當如何捐軀委命且非所愛承流宣化固宜自勉而臣性資懦弱不習吏事規模淺陋短於御衆加以素有悖眩之疾發作無時年垂七十精力衰耗曠戾日增深惟長沙地控湖廣統縣十二自昔戶口為諸路之冠中興以來生聚涵養已及承平四十餘萬之數使臣不病不老尚非守帥之才矧衰疾如上所陳者乎然臣前日不敢固辭冒昧一來者正以陛下親加擢用恩意隆厚臣子之誼所當欽承也適有天幸憑藉聖化竊祿

彌歲偶未底於司敗今年至病侵枝窮力竭宜去不去
 私心固難自安其在公論將不容恕伏望聖慈俯矜危
 惻賜以祠祿特護其所短免干大戾重貽晚節之羞亦
 冀捨劇就閒專事醫藥或少延於暮齒天心報塞沒世
 乃已臣無任虔祈瀝懇之至取進止

奉御筆批
降詔不允

不允詔 倪思撰

勅某云：具悉長沙地控湖廣戶口為諸路冠信如
 卿之言帥守之任必藉重臣卿開藩彌年教明南國
 朕實嘉賴之引疾丐祠良所未喻且卿每上章奏詞
 翰精確年少者所弗及足以驗神觀之不哀矣其體

眷懷勉留填撫所請宜不允

賜銀合臘藥勅書

勅某卿為時元老作鎮重湖履冬序之嚴寒錫珍奩
 之良劑其承眷顧益衛冲和今賜卿銀合臘藥至可
 領也故茲示諭想宜知悉冬寒卿比好否遣書指不
 多及

謝表

良藥分珍申錫堯言之煖哀年被寵頓忘楚塞之寒恩
 厚莫量感深曷報臣某 中謝 伏念臣一切屏翰再值嘉
 平之宣布之小勤積曠瘼之大懼屬嘗移病未許投閒

封泥璽於玉堂以時而授乞刀圭於金鼎何恙弗除豈
 曰彝章亶為異數茲蓋伏遇皇帝陛下博施仁政優待
 藩方頒綸綍之光華融雪霜之凜冽慈憐若此稱塞謂
 何時無札瘥幸同仁壽之域職在綏撫願奏和安之書
 臣無任

謝賜紹熙四年曆日表

歲運無窮裁成密度王春有倣誕告庶邦吏拜賜以承
 流民知時而趨事臣某 中謝恭惟皇帝陛下道參覆載
 職備義和天畏棊忱式九圍而順帝星 隆德齊七政
 以授人凡叨守土之官咸起兢辰之志臣敢不宣頌詔

璽勸勉農疇在曆數於舜躬孰能推步暨朔南之禹教
 尚覲混同臣無任

歷官表奏卷第十 終

誕青宮之胄慶均五殿喜浹萬邦臣聞瓊幹分暉率由
於本固銀潢演潤益自於源深繫今日之蕃昌乃異時
之積累世：修德則儲有羨之休親：仁民則享無窮
之樂盛哉豐報備此燕居恭惟至尊壽皇聖帝陛下道
極際蟠神游冲淡綿本支於百世延壽考於萬年仙李
盤根笑唐塞之未大猗蘭奕葉掩漢事而有光臣幸值
邦榮屬分闡寄南宮北內想昏洽於宸觀左掖右平悵
莫陪於班賀臣無任

賀皇帝表

天佑下民君萬年而錫祚地居上嗣震一索而得男宗

社靈長華夷呼舞臣某

中賀臣歷觀在昔孰擬斯今守

一道以親傳冠百王而聖作當內外泰亨之日且春秋
禹盛之時仰奉重親四海九州之養俯臨甲觀三宮五
殿之歡洽此榮懷光於簡冊恭惟皇帝陛下仁心溥博
德教敷施赫：炎：克篤無疆之烈繩：揖：適符有
道之長是開千億之祥奚止衆多之慶臣夙叨睿獎彌
極懽悰天占人而人占天已驗和同之理子有孫而孫
有子載賡蕃衍之章臣無任

乞宮祠奏 三月上

臣輒披肝膽上瀆冕旒臣去年十月嘗具奏乞宮觀差

遣伏蒙聖旨特降詔書不允臣仰戴天地大恩未知稱
塞深欲勉扶衰憊究心民事圖報萬一今又半載矣身
既益老病亦隨加素苦痰眩發作無時內則心神恍惚
觸事廢忘外則目力昏庸不能省閱其於職業曠弛已
甚蓋臣犬馬之年指日七十平時精力已自弗彊矧當
暮景固應如此特以貪戀君恩不敢便乞休致若抱疴
治郡遷延不去豈惟羞對民吏定須招致人言負聖主
保全之恩垂微臣進退之義此則臣所大懼也欲望聖
慈特降睿旨許臣亟奉外祠歸安田里休養身心少待
年歲乃伸掛冠之請庶粗合於禮經滙懇籲天必期於

允臣無任

第二劄子

臣比於三月間緣年近七十久苦痰眩心神恍惚觸事
廢忘兼之目力昏耗有妨省閱簿書嘗具奏陳乞祠祿
迄今未奉俞旨爰自四月下旬以來復得欬嗽之疾百
藥俱試未見其效日今飲食日減委實不能支吾深惟
郡事浩繁非尸祿養疴之地欲望聖慈檢會前奏特降
睿旨授臣在外宮觀差遣使得一意醫藥保全餘生覆
載之恩朝夕以冀干冒天威臣無任

賜銀合夏藥勅書 倪思撰

勅某卿望隆初棘任重帥藩屬炎暑之維時宜珍調
之有助錫之靈劑實以寶奩尚體眷懷深加攝養今
賜卿銀合夏藥至可領也故茲示諭想宜知悉夏熱
卿比好否遣書指不多及

謝表

殿閣生涼念遐方之炎熱置郵傳命將厚賜以流行施
重立山先生民吏臣某中謝伏念臣猥叨殊遇久典名
邦愠解南薰值虞琴之德洽病多東海慙黯閣之治稱
有來中詔之頒申畀尚方之錫蠲疴攸賴馭幸何功茲
蓋伏遇皇帝陛下道合乾坤禮優藩翰深處九重之禁
每懷萬國之臣穆如清風幸竊窺於宸指慰彼黎庶願
益廣於君仁臣無任

謝復益國公表 八月

華陽黑水裂地而封舊物青璽從天而下磨玷之勤未
著執珪之寵彌加臣某中謝臣聞冬而次之以春夏兆
好生之意剝而受之以復可稽序卦之文蓋天心貴德
而緩刑宜聖主推仁而發政臣之竊位衆所共譏取三
百廛之禾封殖已厚連四千石之重職業殊墮自干舉
枉之誅方抱臨深之懼乃容暮叙不特赦原茲蓋伏遇
皇帝陛下御衆以寬忘人之過俾爾四海識包涵之度

周益公集 卷之十一
豈於一夫遺甄復之恩逢辰則然思報曷已而臣迫於告
老何自圖新獲一吉人莫助舜功之大用三有俊但歌
湯聖之躋臣無任

重明節進功德疏右語

右伏以乾元用九節瀕重九之期萬歲呼三時冀登三
之治雖歌詠辭之贅矣在禱祈理亦宜之皇帝陛下伏
願舜日常明堯天廣覆西佛之壽無量豈惟千劫之多
北辰之居不移宜爾眾星之拱臣無任

乞宮祠奏狀 九月二十七日

右臣輒瀝悃悵仰干睿聽伏念臣夙蒙獎擢度越常倫

起鎮名藩首尾三涉冬序常願竭犬馬之力以圖報於
萬一而臣稟賦素弱病不離身年垂七十哀瘁彌甚春
夏間恭控祠請尚閔俞音尋得痰嗽之疾療治未愈腹
疾繼作藥石雜進如水投石外雖勉強泣事而精神昏
憤職業曠弛隱之方寸揆之筋力若非亟投間散恣意
保調豈特招致人言必將自速斃踣投誠君父一語敢
欺伏望陛下恢廣鴻私眷憐舊物特與宮觀差遣使之
養疴田里涵泳聖澤餘生未泯尚期酌天地之恩臣無

任 十月十三日 上十六日
奉御批降詔不允

不允詔 十月十七日

勅某省所奏乞特與宮觀差遣事具悉卿以相臣宿望作牧湘楚郡政巨細靡不究心於茲三年教明南國夫勞於前者逸於後優游坐嘯務舉大體今其時矣膚腠小疾尋當痊愈丐祠之章胡為屢却而復至乎其存精神止念慮親藥餌以輔和庸副眷注之意所請宜不允故茲詔示想宜知悉冬寒卿比安好遣書指不多及

辭免隆興府奏狀 十二月十七日

右臣伏觀進奏院報十一月二十五日三省同奉聖旨周某可判隆興府疾速之任恩意有加繇遠而近非臣

朽邁所克欽承敢控忱辭仰干聰睿伏念臣幸逢明聖誤被簡知典領藩維更歷三臘才駑力弱政拙心勞不勝狗馬之疾願投閒散屬勤詔諭未賜曲從方且叩閤再有所請忽叨易鎮滋不皇寧益地以潛藩為重任以鄉部為寵陛下之眷臣可謂厚矣年至則理當告老病侵則艱於陳力臣之自處謂宜如何若復不自揣量猶將冒昧既愆於義實畏人言伏望聖慈深閱哀殘洞照惻悞收還符竹改畀宮祠使之養疴里閭粗適分願少需旬月遂乞歸休天施地生孰大於此緣臣已聞移命難留舊治候有劄到即歸本貫吉州恭聽俞旨伏乞早

賜處分冒犯宸嚴臣無任

不允詔 倪思撰

勅某省所奏辭免判隆興府疾速之任恩命事具悉
卿國之元老外領帥藩重湖以南蒙福多矣乃頌綸
旨易鎮洪都地望益雄道里為近第室所寓殆同鄉
部有畫繡之輝烏坐嘯卧護忱所優為懇辭忽來何
冲挹之過亟其勉哉庸體朕意所辭宜不允故茲詔
示想宜知悉春寒卿比平安好否遣書指不多及

慈福慶壽賀表

慶鍾文母豈惟八十年聖女之興禮歲湯孫更祝萬億

載天休之敬三宮和氣四海歡聲臣某中賀臣聞奉親
者家國至榮况重親之在上慶壽者古今罕覩矧高壽
之未央天丕佑於皇朝時兼崇於盛典恭惟皇帝陛下
仁心廣博聖治昭彰以厥庶民久矣達大家以教孝於
其王母茲焉受介福以及人愜聖父之慈懷副寰區之
公願臣自欣晚節獲值昌辰莫陪特揖之班但幸殊常
之遇其為拊蹈實倍等倫

賜銀合臘藥勅書

倪思撰

勅某卿寅亮元臣久宣勞於鎮撫嘉平令序屆屬候
於嚴凝靈劑式珍頌調攸助諒朕心之是體俾民瘼

之有瘳今賜卿銀合臘藥至可領也故茲示諭想宜知悉冬寒卿比好否遣書指不多及

謝表

天無私覆外懷五玉之臣帝有恩言中錫萬金之劑凜乎歲晚倏爾春回臣某中謝伏念臣昨被綸書起司符竹考湘纍之九辨閱楚戶之三霜多病所須常求藥物十全為上未造醫師茲逢漢宮臘飲之時乃冒唐殿銀罍之澤茲益伏遇皇帝陛下道遵皇極治格泰和惟疾之憂每推父母之愛日生之德更廣乾坤之仁故當凝汲之辰特有珍良之賜臣敢不勤於服食稱是恩榮候

屬初寒深察小民之怨居防美疾載思惡石之生

紹熙五年

再辭判隆興府奏狀

正月二十

臣昨奉聖旨判隆興府尋具辭免伏蒙聖恩特降詔書不允仰銜隆眷俯震危衷尚念公私之間利害非一須至再彈情愫上瀆聰聽臣竊惟江湖都會事繁地重歲在庚戌嘗叨除授揆才控免曲荷矜從今齒髮益衰疾患未愈甚非前日之比苟或養疴竊食何以上寬憂顧此有害於公者也屬聞境內頗罹水旱幸賴漕臣兼領府事多方措置得以少蘇一旦改易帥守縱欲恪遵前

矩其如才力弗逮首尾未必相應此有害於民者也兼
 臣來年七十春月之後自合告老迎新送舊徒費邦財
 倏來忽去亦害私義至於田廬姻戚隸其所部雖朝廷
 有所委任或不以此為嫌在於人情終是窒礙臣所以
 寧觸煩瀆之罪重為遜避之請蓋權事體輕重有不能
 自己者爾伏望聖明委照天造垂憐回此誤恩賦之祠
 祿况監司既已試可何惜就加陟明非特有利公家抑
 亦諧臣私志竭誠瀝懇天監必昭干冒宸嚴臣無任月
 十一日三省同奉聖旨
 依所乞差醴泉觀使

謝醴泉觀使表 二月

臣某言伏奉勅命差臣醴泉觀使臣已望闕祇受遙謝
 訖者分竹無功懇辭鄉部負茲諸侯有疾曰負茲事有
 疾願備祠官賜報曰俞銜倒恩以泣臣某中謝伏念臣平
 持弱植浸涉滌塗念異時嚴近之班適同甲賢能之衆
 今考正元之朝士僅同下國之靈光藉令齒宿而意新
 尚當止足况復老知而耄及自合歸休荷從欲之隆私
 徇祝釐之固請此蓋伏遇皇帝陛下恢洪聖度軫惻仁
 心飽碩鼠於太倉彰吾廣大秣病駒於中廐待物初終
 乃眷哀殘不忘惠顧臣遭逢若此報塞謂何家請官供
 愧甚千鍾之享天長地久勉稱萬壽之祈臣無任

重華上僊慰皇帝表

臣某言伏觀大行至尊壽皇聖帝六月九日遺詔者竊以重華厭世率土傷心臣某誠哀誠痛頓首頓首恭惟皇帝陛下天性所鍾聖情難處仰祈節抑俯幸臣民臣限以奉祠在遠不獲奔赴宮庭臣無任屏營推迫之至

重華上僊慰太皇太后表

皇太后
皇后同

伏以昊穹不弔大行至尊壽皇聖帝奄棄天下之養臣某^{中慰}恭惟太皇太后殿下遭此變故聖情難居臣限以奉祠在遠不獲奔赴宮庭臣無任屏營推迫之至

重華宮功德疏右語

右伏以別宮移御又遺赤水之珠仙馭遐升俄墜橋山之劍假勝緣之溥博資覺路之逍遙大行至尊壽皇聖帝伏願威神在天德澤垂後西方世界自己樂於真遊南瞻部洲尚密依於陰隲臣無任

移御壽康宮起居表

臣某言恭聞太上皇帝陛下擇日移御壽康宮者春秋鼎盛思延安樂之年宵旰倦勤自適清閒之燕凡居履載咸仰聖明臣某^{中謝}恭惟太上皇帝陛下德洽民心仁根天性謂中興幾於六紀而禪備於兩朝欲纂高風遂頒明詔成康並處而頌聲作慶越宗周禹啟親傳

而謳歌歸事踰有夏臣受恩久矣報德茫然逖瞻桂殿
之華慶祝椿齡之永

皇帝登寶位賀表

臣某言伏觀七月五日詔書皇帝陛下登寶位者上承
三宮下撫萬國天地開泰華夷懽呼臣某 中賀 恭惟皇
帝陛下性稟英明生知仁孝方居未卹心已繫於兆民
請正青宮奏殆踰於千牘茲臨大寶必底丕平臣又冒
國恩坐縻祠廩幸值龍飛之慶阻陪獸舞之班徒與生
靈共深欣戴

重明節開啟疏

伏以春秋禹盛思延有永之年宵旰倦勤自享無窮之
樂載臨誕月申祝壽期太上皇帝陛下伏願安靜修身
冲虛適性千祥百福備集於聖躬億載萬年永膺於榮
養

重明節功德疏右語

右伏以越帝王之高致道固難名亘今古以常存壽何
有極載伸善頌仰贊誕期太上皇帝陛下伏願積聖神
不宰之功享清淨無為之報後天而老益曼羨於修齡
率土之濱永涵濡於盛德

重明節賀表

臣某言恭遇九月四日重明節者伏以褰裳高蹈仰黃
屋之非心繞電載臨效華封而祝聖雖曰雲天之遠居
然葵藿之傾臣某中賀恭惟太上皇帝陛下道大難名
功成弗處永矣溥天之養巍然太極之尊有道之長方
綿延於周曆無疆之壽自跨越於莊椿臣身也奉祠心
焉存闕徒因彌月之旦申詠後天之詞

瑞慶節開啟疏

伏以十月為陽古稱良月萬年受祐今紀初年恭即淨
坊敬繙秘典皇帝陛下伏願修齡歲衍厚福日增以台
正於四方固有弗服惟天佑於一德罄無不宜

瑞慶節滿散疏

鳳紀編年肇履崇高之位龍宮浴聖旋逢震夙之期集
彌月之善緣祝萬齡之睿筭皇帝陛下伏願明齊日月
道冒華夷將治戎家肆復高祖之德維新厥命永底烝
民之生

瑞慶節功德疏右語

右伏以星隱夜明周紀佛生之瑞天長地久唐標聖誕
之期茲際昌辰是伸善頌皇帝陛下伏願明齊日月道
冒華夷隆榮養於宮庭洽歡聲於海宇威儀而由群匹
既符假樂之詩壽富而使多男更協封人之祝

瑞慶節賀表

臣某言伏遇十月十九日瑞慶節者鳳曆編年肇履宗
 高之位龍宮浴聖旋逢震夙之期紀節有初呼嵩無斁
 臣某 中賀恭惟皇帝陛下道繩祖武仁契天心將治我
 家肆復高祖之德維新厥命永底丞民之生與國咸休
 自今以始臣久叨榮祿晚際盛時阻稱萬壽之觴願獻
 千秋之鑑

冬至節賀表

臣某言伏以七日之來禮方隆於亞歲萬年之祝時正
 紀於初元居然有截之區同此無疆之頌臣某 中賀恭

惟皇帝陛下得天之統如日之常歲儉而豐何待占雲
 之邈人安以樂自應測景之長陽德加亨聖圖益廣臣
 奉祠迹遠存闕心勞雖歎舞之無階在葵傾而敢怠臣
 無任

明堂禮成賀表

臣某言恭聞明堂大禮慶成者消休中辛祇見上帝情
 文交舉幽顯來歆臣某 中賀 臣聞禮莫重於肇禋孝尤
 嚴於尊祖其在周室成王祀文王於洛中至於漢朝武
 帝祠高帝於汝上適成熙事允屬昌時恭惟皇帝陛下
 執道御今憲天稽古言念九筵之制適當三歲之秋謂

壽皇垂後世之規宜參而用况太上下先期之詔當述而行果儲有羨之祥永錫無疆之祚臣頃嘗議禮今阻陪祠嘉與咸生共綏需澤

辭免覃恩轉官奏狀

右臣據本府進奏官姚彥珪報八月二十六日宣制以臣該遇覃恩特轉少傅臣聞命震惶罔知所措義難冒受須至懇辭臣竊惟登極需思凡文武臣皆許增秩此乃溥天之幸會不繫臣子之功伐列聖已成故實宰執例是轉行往者壽皇聖帝傳位太上皇帝實為國家大慶又非累朝繼世之比臣於斯時適在政地恩遷一官

遂尾三少控免至於八九批詔亦如其數仍蒙兩宮宣諭典故如此非礙正法不當固辭兼陳俊卿帥金陵垂滿二年亦自特進而遷少保臣是以不揣才分既稽舊制又循近比迫於威命靦顏祇受 罷政之後言者弗思幸會猶曰無功今陛下受禪云初愛惜名器而臣衰老殘疾待盡田閭飛龍御天之日不獲陪百執事率舞庭下即與頃年當軸目覩大慶事體殊異儻或冒昧苟貪榮寵人將有詞臣亦無說是敢直披心腹控告君父不復文飾仰瀆聰聽伏望聖慈即賜寢免以安孤迹以全暮景臣無任

不允詔

直學士院接鑄撰

勅某省所奏辭免特轉少傅恩命事具悉卿以三朝元老身佩安危退處東山直欲棄置人間事顧豈以爵秩為心哉朕初臨御注想不忘下詔乞言疏恩進律亦可以見朕意矣覃霈之頒無遠弗届安有違尊如卿而可但已保傳一間不必固辭遜章甚力非朕所望所辭宜不允故茲詔示想宜知悉秋冷卿比平安好否遣書指不多及

覃恩辭免轉少傅表

臣某言近具奏辭免覃恩除臣少傅恩命伏蒙聖慈特

降詔書不允者作君師而相上帝華際龍飛亮天地而弼一人敢叨鴻霈曲煩溫詔增震危衷臣某 中謝 臣聞

氣回春而萬物生邦有慶而兆民賴惠澤固周於溥率等差宜別於重輕若輔佐居中捧東日於天衢之上或親賢在列拱北辰於霄極之間以此疇庸是云馭貴如臣者身藏缺畝景薄崦嵫掛神武之冠方將有請揚王庭之號豈所當然夫何特揖之官亦在序陞之數懼貽清議祇控丹誠伏望皇帝陛下勉勵人材操持公器雖推恩不可以不廣而詔爵不可以不嚴已彰均一之仁盡寢優隆之命大辭如慢非晞難退之風小智自私姑

道貪夫之謂臣無任

不允詔 接鑰撰

勅某省所上表再辭免除少傅恩命事具悉朕勉紹
丕圖方修初政首推需澤溥及羣工惟予元老之賢
宜陟孤卿之秩偃息而藩魏室何必在廷寅亮而命
周官是為進律載披來奏殊咈眷懷早於公尊於卿
亦惟均耳一而俯再而偃何以多為茲繫具瞻毋庸
固避所辭宜不允不得再有陳請故茲詔示想宜知
悉冬寒卿比平安好否遣書指不多及

謝差官賜告奏狀

右臣伏蒙聖慈差閤門官趙嗣祖等賜臣少傅告身者
明兩作離初升杲之日王三錫命加賁皇之華驚
寵數之便蕃聳榮觀而歆艷雖祈反汗當識謝生伏念
臣早冒龍光晚叨燕佚心猶馳於魏闕夢自隔於鈞天
締冕篆車詎意班聯之進篳門圭竇猥勤暫御之臨固
難祇奉於綸章豈易仰當於宸渥此蓋伏遇皇帝陛下
仁先念舊政務作新博致名駒弗遺於老馬兼收羣植
不棄於朽株飭遣軺車寵綏末路孔伋之拜使者已欽
君命之將蔡謨之辭司徒敢怠人臣之禮永言難塞惟
警糜捐 除已將告命寄吉州軍資庫伺候回降指揮

月五日集
繳納外臣無任

又手劄

臣妄庸老疾踰伏寒鄉恭值皇帝陛下正位九五不獲
進陪多士瞻望清光幸與庶民均被惟新之澤豈謂聖
慈曲推異數序進孤班千里而遙遣使賜告臣雖揣分
辭避期於寢免然恩施隆重實踰丘山已別狀奏謝謹
復具手劄叙感戴兢懼之萬一附使者以聞伏乞睿照

再辭免覃轉表

臣某言伏蒙聖慈以臣上表辭免少傅恩命疊降詔書
不允不得再有陳請者乾用九以御天爰下博施之澤

巽以重而申命未俞懇免之章愚固守於不移令必期
於惟反臣某誠惶誠恐頓首頓首伏念臣賦才至薄竊
祿已多當內禫之時成以外臣而幽屏孤執皮帛阻造
於近班言如絲綸誤叨於殊渥既難安於私誼諒疇允
於公言敬殫迫切之誠甘觸瀆煩之譴伏望皇帝陛下
大明燭隱洪覆包荒察臣兢惶畏避之情恕臣逋慢拒
違之罪惟笑嚔之有為則廉惠之無傷免以陳人累於
新政舜命官而敷教知弗稱於往諧漢受爵以流馳願
曲從於回授臣無任

不允詔
樓鑰撰

勅某省所再上表辭免覃恩除少傅恩命事具悉朕
嗣膺洪祚注想宗工比陞孤棘之班實霽蓼蕭之澤
雖云恩厚非曰予私凡卿之言近已行於一二顧朕
所與辭何至於再三若夫馳爵之科尤匪尊賢之意
尚承眷渥毋事勞謙所辭宜不允不得再有陳請故
茲詔示想宜知悉冬寒卿比平安好否遣書指不多
及

乞將覃轉回授

右臣近三具奏辭免覃恩轉少傅恩命乞許回授伏奉
詔書不允不得再有陳請臣竊以三孤班在一品惟親

惟賢惟有功乃許序進臣咸無烏獲因非常之慶而得
之中外皆謂其不當受豈獨臣不敢受也而辭章三上
優詔三下茲乃明主初政遇臣以禮不欲失朝廷之故
事又緣臣遠在江西往復經涉時序致勤王人賜告以
示光寵廬陵士民共驚創見臣兢營跼蹐雖嘗望闕稽
首拜使者之辱附表陳謝而敬以制書寓諸有司屏息
傾耳恭聽回授之命豈謂聖恩過厚久未報可夫受爵
不避詩人有斯止之戒臣豈應以垂盡之年自貽伊戚
是敢殫竭悃悃終冀矜允益竇尊有罪君父或不汝疵
叨蒙非據公論必難情恕臣於二者知所擇矣伏望聖

慈即賜處分施行臣無任

申尚書省狀

右某昨三具奏辭免覃恩轉少傅恩命三奉詔書不允除別具奏乞回授外今錄本在前欲望朝廷特賜敷奏即從所乞以安愚分謹具申尚書省伏候指揮

謝明堂禮成加恩表

臣某言伏奉制命以明堂大禮慶成加臣食邑一千戶食實封四百戶者奉繭粟以祠肇稱禋祀開蠶叢之國申衍戶租汪洋上聖之恩滿溢下臣之分臣某中謝伏念臣自還里閑浸遠闕庭屬當三歲之期大講九筵之

禮阻同列辟儼績珮以趨班殊異通侯輸酎金而獻廟孰謂制函之下復叨書社之增稽首拜嘉捫心積愧茲蓋伏遇皇帝陛下事天寅畏保國寬仁七戒三齋諱勞何有九州四海錫福無遺是均曼美之祥亦及疲瘥之老三五六經之載籍初莫預於討論萬八千戶而冠軍茅深慙於勳伐言念逢辰之幸誓肩報上之心臣無任

歷官表奏卷第十一終

歷官表奏卷第十二

周益文忠公集一百三十三

慶元元年

乞致仕表

正月一日

臣某言伏以三千同臣心甫際興王之運七十致君事
適臨告老之年在聖時雖曰難逢顧經訓則當易退仰
祈從欲俯遂乞身臣誠惶誠懼頓首頓首伏念臣以一
介之荒遺竊四朝之榮遇讐書分察於群英之後修注
代言於強仕之前投閒中避於要權起廢晚膺於簡擢
從班政地俱閱十春孤棘公圭咸躋一品叨塵過矣報
效茫然迫於遲暮之時加以衰羸之疾內循涯分允合

歸休惟貪戀於盛明乃遷延於歲月今而年至可以情
聞已愧歐修踰六旬而得謝尚晞杜衍終一請而獲從
伏望皇帝陛下軫念孤蹤保全末路收內祠之祿秩返
初服之耕桑庶佚餘生永陶至化江涯海島任鳧雁之
少多挑野華山縱馬牛之歸放懇誠惟切察允是期臣
今乞守本官致仕臣無任

不允詔

勅某省所上表乞守本官致仕事具悉宿艾之臣國
家所寶故尊事黃耆乃成福祿之盛雖無老成尚以
典刑為賢朕閱中外之良每歎壽俊之少如卿舊德

為時宗工久位公孤正資弼亮於四世借令耄猶
當就見於百年克壯爾猷胡謝乃事雖不渝東山之
志寧詎忘本朝之心尚體眷懷毋拘常節所請宜不
允故茲詔示想宜知悉春寒卿比平安好否遣書指
不多及

第二表

臣某言臣近以年及七十上表乞致仕伏蒙聖恩特降
詔書不允者一辭而退荷宸眷之曲留三思而行審愚
衷之素定延望雲天之施仰干鈇鉞之誅臣某 中謝臣
才不如人生而多病幸會蚤塵於顯仕平居常懼於疾

願雖深止足之思未效涓埃之報固不敢先期而引去
又豈容翫歲以忘歸頃在湘中常屢形於表奏違移江
右即力避於旌麾既尋香火之盟實便立園之計臣之
此意衆所共知今者血氣益衰筋骸難強人皆憐其憔悴
自亦畏於滿盈乃昧禮經猶饗廩稍辭榮壯歲居慙
烈士之風戒得暮年尚佩聖人之訓伏望皇帝陛下深
仁恤物大德矜愚念其持筆橐於累朝許以掛衣冠於
盛世轅駒局趣本無老驥之心蓬鷗翱翔非有冥鴻之
志陳情已竭得請為期臣無任

不允詔

樓鑰撰

勅某省所再上表乞致仕事具悉七十致仕雖著於
禮經二三大臣難拘於古制矧惟元老嘗冠中台周
旋兩朝負荷重事既于蕃於南國終退處於東山神
明未衰德望彌邵奉真祠之香火自樂隱居掛神武
之衣冠胡為早計抗章再至陳義愈高顧難徇於冲
懷尚少安於素履所請依已降指揮不允故茲詔示
想宜知悉春暄卿比平安好否遣書指不多及

第三表

臣某言近再上表陳乞引年致仕伏蒙聖慈再降詔書
所請宜不允者仕而無補每負愧於初心老則告歸盍

求全於末路敢期溫詔尚閱俞音庸祇竭於血誠庶必
諧於素願臣某 中謝 臣聞休退者人臣之常事眷留者
明主之異恩或才德出群可備國家之用或精神尚壯
未容田畝之安縱復少需固將有說如臣者最為闡茸
仍迫衰殘少日遭迴不謂躡躑於臚仕半生羸瘵何嘗
敢望於高年而乃攀聯執帛之班荏苒從心之歲僥踰
既極災疾宜侵自去夏以迄今蓋無時而不病形容枯
槁志氣蕭條雖家事以當傳豈官榮之可冒遲回不去
觀聽謂何非力謝於軒裳殆兩誓於禮法深虞隕越難
避黷煩伏望皇帝陛下俯監危悰曲加鴻施無功有過
恕既往之愆尤善始以終賜不賢之造化假餘齡之燕
佚觀盛世之隆昌乞骸彊健之時莫追明哲擊壤寬閒
之野尚答生成臣無任

謝致仕表

臣某言伏奉制命授臣少傅依前觀文殿大學士益國
公致仕加食邑一千戶食實封四百戶臣已望闕祇受
遙謝訖者告老叩閣屢讀前疏之聽疏榮就第特陞左
棘之聯遂止足之私情彰優崇之異數雖故事無控辭
之禮在愚臣重僥倖之慙臣某 中謝 臣竊考中興以來
旋觀故相之籍擇 廟堂之上殆三十人引年祠館之

中總一二數益進用多由於壯歲故退休罕及於暮年
如臣者素乏才能晚叨任使坐竊無功之祿免羞有道
之貧不自意其父生乃及時而得謝仍紆皇眷申錫鴻
恩昔疏受漢之名儒居易唐之遺直皆歷儲宮之傳用
為晚節之榮臣愧非二子之賢忝正三孤之秩職宗祕
殿爵極諸公初終盡出於遭逢高厚莫勝於戴履茲益
伏遇皇帝陛下德隆堯舜仁法祖宗愛養人每急於親賢
興孝尤先於貴老誕布絲綸之渥惠綏簪履之遺臣祇
服龍光退誇族黨遂桑榆之暖餘生幸適於丘園傾葵
藿之心未死常依於天日臣無任

辭免冊命奏狀

右臣伏準制命除臣少傅致仕寵光過厚榮感倍深稽
諸故事不敢輒具辭免已上表稱謝外惟是冊命之禮
雖見任三孤無敢當者况在休致之臣伏望聖慈即賜
寢免臣無任

孝宗小祥起居表

臣某言六月九日恭值孝宗哲文神武成孝皇帝小祥
者重華僊御永矣賓天別殿几筵茲為周歲臣某
中謝
恭惟皇帝陛下懋隆孝治允篤時思願寬念祖之懷俯
答含生之望臣無任

賀重明節表

臣某言恭遇九月四日重明節者伏以褰裳高蹈仰黃
屋之非心繞電載臨效華封而祝聖雖曰雲天之遠居
然葵藿之傾臣某 中賀 恭惟聖安壽仁太上皇帝陛下
道大難名功成弗處永矣溥天之養巍然太極之尊有
道之長方綿延於周歷無疆之壽自跨越於莊椿臣久
備宮僚今歸農畝徒因彌月之旦申詠後天之詞臣無
任

慶元二年

賀生皇子表

臣某言伏觀降誕皇子頌降德音者泰元眷佑嫡長挺
生列聖憑依三宮悅豫臣某 中賀 臣伏以功行積累既
存不已之誠子孫衆多斯錫無疆之祉天人合契今昔
同符恭惟皇帝陛下道法祖宗化行宮壺夏家仁遂適
神禹之三年周室宗彊肇文王之十子誕布龐鴻之澤
丕昭蕃衍之祥臣身已歸田義當擊壤嘉與含生之衆
共深頽慶之情臣無任

賀三宮冊寶禮成表

臣某言恭聞十月三日奉上壽聖隆慈備福光佑皇太
后壽成惠慈皇太后聖安壽仁太上皇后冊寶禮成者

九重之重^上逮事三宮一日之間虔敷四冊情文並舉夷
夏交欣臣某中賀恭惟皇帝陛下誠心格於上穹榮養
隆於華旦奉父母而及於王母連萬壽之徽稱自殿庭
而達於內庭聳兆民之壯觀繇堯舜禹相傳而後獲邁
周漢唐既往之前聞臣幸以餘生逢茲濶典嘉與農疇
之衆永依孝治之仁臣無任

賀韓皇后冊禮表

臣某言恭聞十月六日皇后受冊禮成者彰內治之功
又宣陰教發外廷之冊今講縟儀月朔日以增明臣暨
民而胥悅臣某中謝恭惟皇帝陛下孝隆親養政急家

齊歷選勲賢蓋自重親之命榮如^上儼^下適同三殿之歡
振古未聞在今創見臣已還官政莫綴朝班仰繫覆載
之功實預榮懷之慶臣無任

慰慈福上僊表

臣某言伏覩大行太皇太后十一月六日遺誥者變生
慈福悲動綿區臣某誠哀誠咽頓首頓首恭以大行太
皇太后年開九帙之三坤載四朝之久極北宮之榮養
侍高廟之宸遊皇帝陛下以萬乘之尊崇曾孫之孝特
從朞制昭示聖心願寬朝夕之思垂副華夷之望臣限
以退居田里不獲奔赴宮庭臣無任

慶元三年

重明節功德疏右語

右伏以天錫慈皇之壽以莫不增民懷聖父之仁其何能已虔敷秘典仰贊昌辰聖安壽仁太上皇帝陛下伏望以無為之化丕冒群生以不宰之功常居太極列真千佛共儲有羨之齡諸夏百蠻永效無疆之頌臣無任

賀瑞慶節表

臣某言伏遇十月十九日瑞慶節者誕期適上冬之爰景肇禋歲禮前半月之昌辰天開有永之年人獻無疆之頌臣某中賀恭惟皇帝陛下仁周夷夏德合祖

宗萬邦奠枕之時治功已著三世稱觴之慶歷代所無永居北極之尊高媿南山之壽臣身烏歸里心則望雲莫陪漢殿之班徒效堯封之祝臣無任

謝郊祀禮成加恩表

臣某言伏奉制命以郊祀大禮慶成加臣食邑一千戶食實封四百戶臣已望闕謝恩祇受訖者聖人饗帝阻陪左右之璋退老明農尚益南東之畝窺絲綸之溫厚顧襚禎以光華臣某中謝欽惟熙朝最重禋禮廣配天之澤曾不遐遺眷居里之官每同通列如臣無狀被寵有年氓受一廛上方行於仁政侯封萬戶位乃極於布

衣逮逢慶賚之頒彌覺面顏之覲茲益伏遇皇帝陛下
誠通穹壤道法祖宗順迎日至之陽肇講國南之紀綱
去三而施惠德及飛潛爵惟五以馭臣恩覃中外肆推
餘餽加賁朽株臣久矣伏藏缺然報稱受釐宣室想帝
席之夜前賜胙齊侯凜天威而下拜臣無任

慶元五年

謝慶禮支賜奏狀

右臣承吉州遵奉今年八月二十六日慶禮詔書致禮
詔書致仕文武官七十以上依格支賜羊酒粟帛曾任
太中大夫以上仍與倍賜長吏致禮差官就賜臣已望

闕祇受訖臣無任

賀生皇子表

臣某言伏覩降誕皇子特頒德音者高禔錫羨長嫡挺
生列聖儲休三宮交賀臣某中賀臣聞德如堯帝祝多
子於封人聖若文王詠百男於詩雅厥今盛事與昔同
符恭惟皇帝陛下纂國丕基受天明命當藝祖肇邦之
歲暨統元更歷之春是開蒼震之祥於赫炎圖之永臣
屏居農畝遙睇闕庭眷同四表之歡仰賴一人之慶臣
無任

慰太上皇后上僊表

臣某言恭聞六月四日大行壽仁太上皇后上僊者災
纏長樂悲動嚴宸臣某誠哀誠咽頓首頓首伏以壽仁
太上皇后沙麓儲祥河洲協詠勤宣婦道誕育聖躬皇
帝陛下欽念母慈備彰誠孝宮中自行六載之制天下
咸識一人之心願寬罔極之哀永御無疆之曆臣限以
退伏田里不獲奔走宮闈臣無任

慰太上皇帝上僊表

臣某言伏觀大行聖安壽仁太上皇帝遺誥者天心難
測 薦臻甫涉夏秋兩喪考妣臣某誠哀誠痛頓首
頓首臣竊以慈懿寢園之奉 馭將歸聖安升鼎之

龍胡以斷黎庶攀號而不釋聖神悲痛以何堪恭惟皇
帝陛下孝通神明躬大舜終身之慕 有唐

二聖之歡方隆榮養 變

故諒極哀恫願寬 恤之情毋爽宅憂之禮臣退休田
里阻造宮庭臣無任

壽康宮追薦疏右語

右伏以六年端尹久叨雨露之私三月宰庭未効消塵
之報雖下機於一篋旋為帥於十連逮聞 以自怡
亦復掛冠而歸老茲為奉諱久矣孤恩欲申豺獭之微
誠是假龍天之 大行聖安壽仁太上皇帝伏願道

遙 路佐佑皇圖從祖考在天之靈篤子孫下地之慶
謝明堂禮成加恩表

臣某言伏奉制命加臣食邑一千戶食實封四百戶臣
已望闕祇受訖者 天甫竣宗祀加地爰暨老臣異數
臨餘生何幸臣某 中謝 臣竊以大封於廟 予之

詩乎 於庭法夾揚之象必善 允稱豈不澤之
如臣者初乏 猷 叨爵秩 猷畝不能躬黍稷
以未 掛衣冠猶 而賜胙茲焉 甚食

功此蓋伏遇皇帝陛下寅詔丕 欽崇鉅典內極念親
之孝外嚴 類之 推餘餼以馭臣示隆私而篤舊則
其土壤厥惟上：之田賁乃丘園奚止爰：之帛莫展
既愆之力空懷欲報之心臣無任

慰韓皇后上僊表

臣某言伏覩進奏院報大行皇后上僊者桂輪隱耀椒
掖闕儀厚載既傾淵衷斯惻臣某誠哀誠咽頓首頓首
伏以大行皇后天資恭儉地望高華久殫婦順之勞正
倚坤寧之助奄從先后莫返中闈恭惟皇帝陛下孝切
亮陰恩隆儂極雖聖情之易感顧天數之難移願寬當

寧之思垂副含生之望臣退居田里阻造宮庭臣無任
謝降官表

臣某言伏奉告命降授少保依前觀文殿大學士致仕
臣已望闕遙謝祇受訖者告老七年宿愆故在貶官一
列洪造難名所慚垂盡之時自抵怙終之罪臣某

中謝

伏念臣疎庸一介際遇四朝逮事高皇早塵臺省受知
孝廟父玷機衡不思勉效於同寅乃敢與聞於異論既
肺腑衆所共見豈口舌獨能自文惟先宗興念於元僚
疊分閭寄肆陛下曲憐其末路許遂里居首將正於孤
丘巢忽危於燕幕狂夫妄發姓名輒及於樵蘇公論大

喧黜罰盍輸於薪粢止削司徒之秩猶存平土之官茲
蓋伏遇皇帝陛下洽德好生馭民敬固國皆曰殺雖微
可恕之情羗不加刑姑用惟輕之典非特匹夫之受賜
是令四海之歸仁臣有愧積中無階報上省譽田野視
桑蔭以幾何託命乾坤比櫟材而知免臣無任

慶元二年

賀太皇太后加上尊號表

十二月

臣某言恭聞加上壽成惠聖慈祐太皇太后尊號冊寶
禮成者三朝母道丕昭行地之功六字號榮益顯補天
之德化行宮壺風動華夷臣某

中謝恭惟皇帝陛下適

文瑞樓

駿孫謀懋隆孝治從行慶壽續盛事於熙寧奉獻義安
掩前聞於咸泰有衍玉卮之禮無疆金母之年臣又返
農疇幸逢邦慶昔長秋儷極叨視草於制麻今廣內歲
儀但綴班於孤棘永言拊蹈實倍常均臣無任

辭免復少傅狀

少保觀文殿大學士致仕益國公周某狀十二月十八
日已時準尚書省遞到劄子十二月九日奉聖旨周某
留正並特與復元官致仕伏念某叨踰滋久罪戾實深
比致人言祇從輕典仰銜天施方省前愆雖歷歲時未
經赦宥敢圖洪造驟洗丹書俯伏以思兢惶併集謹附

元遜筒回申尚書省乞賜敷奏且今依見存官致仕庶
安孤迹以保餘生伏候指揮

閏十二月二日三省同奉
聖旨不允令學士院降詔

不允詔

勅某省三省進呈卿狀辭免特復元官致仕恩命事
具悉卿蚤司鈞軸峻躋朝棘之班已掛衣冠久遂家
山之佚比騫華秩姑塞嘖言全節高明卿久著四方
耆碩之望茂恩優禮朕思宗三朝魁舊之賢並復故
官爰頒新渥宜祇成渙胡事謙辭所辭宜不允故茲
詔示想宜知悉冬寒卿比平安好否遣書指不多及

賀立揚皇后表

閏十二月

臣某言恭觀進奏院報降制立皇后者二儀奠位協成
覆載之功兩曜宣精丕顯照臨之象盛典朝敷於宮掖
歡聲夕徧於海隅臣某中謝恭惟皇帝陛下德本身修
化刑內治正中宮之御禮可已乎承大母之願養之至
者粲是星妃之首儷於天極之尊既表正於婦儀亦述
宣於陰教臣里居歲久邦慶時逢言如絲綸竦聽郵傳
之命孤執皮帛阻隨仗入之班徒與黔黎胥同鼓舞臣
無任

嘉泰三年

謝復太傅表

臣某言近蒙聖恩復臣少傅致仕尋具辭免伏準詔書
不允已於正月六日祇受制命望闕謝恩訖者閱呂刑
之實周典素輕還疏傳之官漢恩彌重丹書洗滌皓首
兢榮臣某中謝伏念臣坎墮孤蹤推顏暮景冒寵光而
最久積罪戾以殊深比致煩言分甘嚴譴獨賴聖神之
眷許存孤保之官僅閱再朞未經三宥駭新綸之驟下
恍舊秩之來茲益伏遇皇帝陛下徧覆無殊容光必
照刑非樂用汝自速辜恩弗遐遺予無作好誕布發生
之德俯加老退之臣大誠薄懲昔忝小人之福初迷後
順今晞君子之行惟誓糜捐以圖報稱臣無任

賀瑞慶節表

伏以迎上元之甲子寶曆方昌占南極之丙丁壽星有爛標十月為陽之節肇一人有慶之期臣某中賀恭惟皇帝陛下誕聖繼天施仁發政十年生聚俯同越國之時百世本支遠邁周王之壽凡居有截共祝無疆臣身處山林歡均朝野雖弗及羽毛之衆群舞百於虞廷豈不如土石之頑助呼三於漢嶽臣無任

嘉泰四年

謝郊祀禮成加恩表

臣某言伏奉制命以郊祀大禮慶成加臣食邑一千戶

食實封四百戶臣已望闕遙謝祇受訖者祀以一純二精格三靈之景既德徧羣黎百姓洽四表之歡心霑然滲漉之恩惠此疲癯之老臣某中謝伏念臣蚤持薄技

久覲盛儀玉輅安行嘗預執綏之選金鑾傑直屢裁肆昔之書歷二府之弼諧導一人之陟恪晚安新政歸老故鄉舜樂九成已斷鈞天之夢漢封萬戶猶披輿地之圖榮幸則多事勞何有茲益伏遇皇帝陛下功繩祖武德契天心清廟徂郊浮霽光於曉日紫壇奠幣翔協氣於層霄歛福孔多均隆滋廣臣猥叨邦賚增耀里居錫之山川土田敢虛霑於帝澤與爾隣里鄉黨期共戴於

君仁臣無任

賀瑞慶節表

伏以冬候曠溫儲祥甲觀天光絢爛載誕聖君薄海春
 回歡聲雷動臣某 中賀恭惟皇帝陛下齊休天地冠德
 帝王共北辰之星常居其所如南山之壽無不或承念
 昔三五之時野多八十之老臣今何幸年適與同播擊
 壤之謠豈知帝力陋守封之請但罄祝詞臣無任

歷官表奏卷第十二 終

